

CBETA電子佛典集成

CBETA Chinese Electronic Tripitaka Collection
eBook

J36nB366

大方禪師語錄

明 行海說 超鳴編

財團
法人

佛教電子佛典基金會



目次

- [編輯說明](#)
- [章節目次](#)
 - [序](#)
 - [吳偉業序](#)
 - [錢廣居序](#)
 - [目錄](#)
 - [公啟](#)
 - [住叟江禪燈菴語錄](#)
 - [歸正圓通普說](#)
 - [拈頌](#)
 - [雜頌](#)
 - [臺山婆子二頌](#)
 - [趙州訪二菴主二頌](#)
 - [首山因僧問如何是佛山云新婦騎驢阿家牽二頌](#)
 - [有句無句二頌](#)
 - [萬法歸一二頌](#)
 - [庭前柏樹子二頌](#)
 - [東山水上行頌](#)
 - [因徑山容和尚垂問文殊是七佛之師因...](#)
 - [徑山索三玄三要總二頌](#)
 - [十智三玄總頌](#)
 - [臨濟七事十九首](#)
 - [賓主句頌](#)
 - [無位真人頌](#)
 - [三玄三要六頌](#)
 - [馬祖一喝三頌](#)
 - [閱歸直總義隨時頌出](#)
 - [閱直性決十則總頌](#)
 - [拄杖二頌](#)
 - [頌天童密雲老和尚二首](#)
 - [明星悟道三頌](#)
 - [頌二祖十一首](#)
 - [杲日麗天四頌](#)
 - [頌馬祖一喝三日耳聾二首](#)

- [頌高峰大師四句偈五首](#)
- [金剛頌](#)
- [四月初八日頌世尊初生公案二首](#)
- [為水牯牛二頌](#)
- [頌法身偈二首](#)
- [法身頌四首](#)
- [源流頌](#)
- [牧牛頌](#)
 - [未牧](#)
 - [初調](#)
 - [受制](#)
 - [回首](#)
 - [馴伏](#)
 - [無礙](#)
 - [任運](#)
 - [相忘](#)
 - [獨照](#)
 - [雙泯](#)
- [偈上](#)
 - [和慈受深禪師披雲臺韻十首](#)
 - [和石屋禪師山居韻四十首](#)
 - [扇頭吟二首](#)
 - [滿關偶成](#)
 - [偶占](#)
 - [迎年](#)
 - [詠梅八首](#)
 - [省幻四首](#)
 - [城居](#)
 - [閱詣南頤陳二大師除夕偈依韻荅之](#)
 - [再和詣頤二大師原韻三首](#)
 - [因事偶成六首](#)
 - [示超宗](#)
 - [示人公案八首](#)
 - [閱歸直總義](#)
 - [指示迷塗二首](#)
 - [閱古德種田語和韻四首](#)
 - [和中峰大師警世偈二十首](#)
 - [示本弘](#)

- [顧玄公居士](#)
- [和栢堂禪師山居士首](#)
- [訓後學志行品](#)
- [懸扁額](#)
- [監院朗直請讚](#)
- [偈下](#)
 - [訪雙林山幢大師讀弘覺老人留題和韻](#)
 - [安三世佛座](#)
 - [圓通應化入藏](#)
 - [示參禪四首](#)
 - [又示參禪四首](#)
 - [西徑山八景](#)
 - [天堂峰](#)
 - [雲筆峰](#)
 - [峨眉峰](#)
 - [萬菊軒](#)
 - [浣雲池](#)
 - [驪珠峰](#)
 - [迎暉亭](#)
 - [鰲魚石](#)
 - [和曹溪憨大師韻](#)
 - [示老不回頭](#)
 - [示眾](#)
 - [過臨安訪楊懷眉明府喜建新署](#)
 - [祝徑山費老和尚六秩](#)
 - [付觀察大可錢](#)
 - [和張拙秀才見道韻](#)
 - [奉慰王書翁護法時在佛山二首](#)
 - [顧仰溪居士持祇園魯公見道偈次韻四首](#)
 - [維摩曉日](#)
 - [山居口占二首](#)
 - [贈太平寺祥符關主出關](#)
 - [贈澄菴關主出關](#)
 - [王俊翁居士呈偈答之](#)
 - [示本弘菴主](#)
 - [示獨覺二首](#)
 - [天童師翁密老和尚題金山和韻](#)
 - [祝雪竇石奇老和尚壽](#)

- [贈錢履卿護法](#)
- [隋費老人住維摩偶成](#)
- [侍老人過溧陽萬古寺](#)
- [和百峰兄禮祖塔韻](#)
- [警回衣二首](#)
- [示頂覺](#)
- [和瑞洪禪師遊五臺山韻](#)
 - [翠岩南臺](#)
 - [挂月西臺](#)
 - [協斗北臺](#)
 - [錦繡中臺](#)
- [和雪菴法師念佛四首](#)
- [種樹成林](#)
- [和雪竇石老和尚韻](#)
- [宸安護法至菴\[言*奉\]經](#)
- [贈陸伯貞居士](#)
- [贈石君用居士](#)
- [贈顧君常居士](#)
- [贈穆瑞芝居士](#)
- [贈倪仁錡居士](#)
- [示世愚癡](#)
- [示劉奉泉預修](#)
- [過建平訪石圭法兄](#)
- [贈頤陳禪師](#)
- [和錢維宇居士](#)
- [和瑞光竺雲禪師扇頭韻](#)
- [贈張敬泉居士](#)
- [贈陳君偉居士](#)
- [贈張瑞甫居士](#)
- [贈張吉甫居士](#)
- [示明法](#)
- [贈項秀南居士](#)
- [贈慧牛耆宿](#)
- [送蒼霞法兄住牛頭塢](#)
- [和青龍和尚扇頭韻](#)
- [贈錢佩玉居士](#)
- [贈超出](#)
- [李欽安居士](#)

- [朱君昭居士](#)
- [贈公安張居士](#)
- [示姚敬泉居士](#)
- [朱伯卿居士](#)
- [羅奉泉居士](#)
- [龔蔚彝居士](#)
- [李瑞雲居士](#)
- [聞孟卿居士](#)
- [贈濟宇陳居士](#)
- [贈曹奕芳同俊明喬梓](#)
- [朱君令居士](#)
- [贈見月禪德](#)
- [示信甫郢居士](#)
- [贈南山李茂初居士](#)
- [陳敬元居士](#)
- [汪侍蘭居士](#)
- [張尚公居士](#)
- [徐胤蕃居士](#)
- [示王明伯居士](#)
- [示聞悟](#)
- [示超功](#)
- [示大坤](#)
- [示超佑](#)
- [示永覺](#)
- [示汪應鳳居士](#)
- [嘆世](#)
- [謝眾檀信](#)
- [詣南和尚辭院](#)
- [贈齊葵林居士](#)
- [和管有葵居士韻](#)
- [悼香林佛古和尚](#)
- [初夏偶成](#)
- [秋思二首](#)
- [除夕](#)
- [元旦](#)
- [付監院朗直徒](#)
- [付盛夫人](#)
- [贈超凡優婆夷](#)

- [精進堂滿七](#)
- [示朗月](#)
- [示普蓋沙彌](#)
- [贈張仁甫居士](#)
- [與普擎禪德](#)
- [卓菴禪德呈偈答之](#)
- [示恒一師](#)
- [示融和](#)
- [徐君選居士](#)
- [示洞然](#)
- [示普明](#)
- [贈超覺](#)
- [示普信](#)
- [為菴主出關語](#)
- [佛事](#)
- [行實](#)
- [塔銘](#)
- [卷目次](#)
 - 1.
 - 2
 - 3.
 - 4.
 - 5.
 - 6.
- [贊助資訊](#)

編輯說明

- 本電子書以「CBETA 電子佛典集成 Version 2023. Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

禪燈大方禪師語錄序

粵聞觀至理者存妙法於鏡中味微言者得玄珠於意外故辭鋒蔚起精義解頤大都刊華就實觀面相呈是以孤光絕響久而益新自非頂門眼正何由肘後靈符至於指示迷途開大知見具大作略全提正令煅煉人天也慨夫心塵易擁識境難清人壽飄遷火宅輪驚枝生節外淘練未純雖竊心皈法未邁機緣今秋多諸過咎落寞襟懷正值大方大師開秘金剛正眼覷破幻緣迺知草鞋踏遍未為親到牢關箬笠高懸始見本來面目每垂片語皆足為人胸襟決不肯以壺滴惡水塗污學人首參天童密老和尚當下觸著鼻孔次參徑山雪大禪師始得四楞著地後參費老人懸崖撒手再進竿頭結冬述夏吐氣揚眉大用大機蓋天蓋地幾於法堂印證欲付堅辭不受志尤超卓咸企高風今且結茅婁土飽道掩關極盡離微掃除知見土面灰頭鋤煙灌雨經行宴坐雲鳥同棲其所拈偈頌諸語余細覽之玄言奧理喚醒浮生如擊石火閃電光壹著子是這般根器方承當得根器不是處用之則堰苗矣噫換骨洗腸重整頓通身有眼更須參吾師知見超群龍天其能捨諸安得壺瓢秋水滿衲孤雲盤譚於天目山頭浮藍蕩白之中可乎。

賜進士第國子監祭酒婁東吳偉業拜撰

大方禪師語錄序

向慕天目徑山宗風遐振遂訪得雙徑明珠堂大方禪師勝道場也因山中爇火蒼決復隱婁江重構禪燈靜室與夫縱譚正覺心境清空蓋大師生平所尚不華而實克究根源昔年參天童先老人鼻出所合如脫衣卸甲素面相呈若宮商比和水月相赴獨不向文字中著腳祇因其頂門上具眼也次參徑山雪嶠老人吸曹溪之無滴會拈花之儼然遂挂瓢雙徑頤頤兩持已而親近費老人重其機用奪縱自由每於人天眾前多方印證幾欲付法無領受意自甘結茆晦跡弢名後老人頻通法翰招之不果諸方至今尚其高節嗟夫衣穿瘦骨露屋破看星眠且其所拈法語詩偈句外藏鋒聲前吐氣露布諸方活潑縱橫收放自由裕後光前應機接物從此四眾川湧龍象雲臻余廣居同諸檀度請和尚上堂當陽露布掛劍眉間縱使八面風來莫不望崖而退昔三聖道逢人則出出則不為人興化道逢人則不出出則便為人且道興化因甚不肯放過三聖只為白拈善竊鬼神所莫測也當日和尚出則為人著有現成公案字字胸中流出權衡佛祖直透臨濟句中三玄三要眼光灼破四天下余廣居昔稱道愛落草盤桓今與法嗣朗真大師亟謀而付之梓是為序。

整飭關南兵巡道陝西提刑按察使司副使奉佛弟子錢廣居頓首拜題

大方禪師語錄目錄

- 序文二
- 請疏一
- 卷一
 - 住婁江禪燈菴語錄
 - 歸正圓通普說
- 卷二
 - 拈頌
 - 雜頌
- 卷三
 - 源流頌
- 卷四
 - 偈上
- 卷五
 - 偈下
- 卷六
 - 佛事
 - 行實
 - 塔銘

縉紳請上堂公啟

伏以神龍奮鬣露物外之金鱗睡虎懸蹄見空中之玉瓜天悅人而盡
仰時到理而自彰敢借一花側聆半偈恭惟大和尚傳達磨不傳之心開臨
濟欲開之眼宏仁接眾而事理雙融風來水面苦行救時而有無不立月到
天心言窮六合總無一字之與人德冠諸方久見三根之普度廣居等粗究
孔氏膚受之道學深企釋迦心印之別傳溪聲山色之詞尚迷門外那知門
內合掌藏身之偈未知斗北誰識斗南惟我大悲用出通身之手眼再見迦
葉扶起當年之剎竿特詹是月八日伏冀大轉法輪廣攝群有蓋因佈嘉種
而望甘霖不辭執暗燈而求亮火從此橫說豎說欣頑石之點頭不論有言
無言喜天花之亂墜廣居等曷勝瞻仰之至。

孫以敬

法弟錢廣居

吳克孝

王瑞國

吳偉業仝頓首拜

大方禪師語錄卷一

住婁江禪燈菴語錄

師於康熙己酉年四月朔日受闔郡吳錢王眾紳衿洎文學居士等請就菴開堂拈疏云墨光動盪直射斗牛之墟瀚海文瀾泛入獅狔之座眾中還有見者麼其或未然卻煩維那重宣此義。

指法座云高廣甚高廣平正甚平正若非毘盧頂上行誰敢輕身而據坐遂陞。

拈香云此一瓣香爇向爐中端為祝延當今皇帝聖壽萬歲惟精惟一乃德乃仁萬國攸同堯天舜日次拈云爇向爐中奉為諸大護法文學居士等伏願常作王家良弼永為法苑金湯復拈云者一瓣香根盤四大部洲葉蔭三千世界昔在天童山裏拾來又於雙徑峰頭證據今日特為拈出供養吳江報恩堂上傳曹溪正脈第三十五世先師浮石老和尚用酬法乳之恩斂衣就坐維那白椎云法筵龍象眾當觀第一義僧問天垂寶蓋瑞氣臨筵大闡宗風則且置如何是棒頭消息師云大方獨步進云機關藏不得一劍定乾坤師云令不虛行進云此話大行也師云知恩者少監院問昔日靈山今朝禪燈結角羅紋一句作麼生師云放光動地進云若然則大機大用覲面提持師云三十棒且待別時來進云萬靈齊合轍大地盡沾恩師云且信一半問薰風自南來殿閣生微涼意旨如何師云從來不覆藏進云日午打三更還許旁通一線麼師便打乃舉拂子云摩醯正眼一點分明蠢動含靈咸歸正覺大圓鏡智宇宙光華鉞砭乾坤帝裘永錫十智同真菩薩面三玄三要夜叉頭圓通殿裏遊戲無礙堂中自在千佛合轍一體風流法輪大轉且道承誰恩力以拂子打○相云觀音菩薩將錢買胡餅放下手卻是饅頭現前大眾向者裏會得縱橫自在收放無拘其或不然山僧打葛藤去也隨聲便喝結椎云諦觀法王法法王法如是下座。

張敬川穆瑞芝陳奉坡設齋請陞座開示師云佛種從緣隨處建立有緣佛出世無緣佛滅度在在體露金風如水中月佛說一切法為度一切心若無一切心何用一切法但有病所在即用一切藥所謂佛是眾生界中了事人今說法者與釋迦同一鼻孔同一唱酬也現在僧是過去佛過去佛是現在僧要見過去佛便請識取現在僧今之天地日月古之天地日月無二無別故愚者說遠智者說近喝一喝云是甚麼所在說遠說近說智說愚汝等諸人不得向外打之遶山僧不惜泥水與相離相法尚應舍處立個生涯倘能走入不可思議境界見種種色都盧是個三藐菩提方見山僧入廬垂手之靈驗也信佛不信法大病不服藥信佛不信僧夜行不張燈佛法僧不信蝦蟆落深井佛法僧俱信杲日行空徑咄還肯與麼說話也未喝一喝云此時若不究根源直待當來問彌勒。

早參鐘聲咬破七條茅店雞鳴春曉王登寶殿野老謳歌且道無邊身菩薩
即今在什麼處拈起拄杖云具通方眼者速速進前痛領三十設有不切
不可道山僧辜負汝曳拄杖歸方丈。

錢履卿瞿承萱王振川張實甫劉公亮倪仁毓項秀峰秀南請陞座臨濟栽
松禪燈種圃雪峰拋毬禾山打鼓他家眼具頂[寧*頁]這裏符懸後股鼻
孔不解通方莫怪山僧莽魯驀地相逢拳揮足舞好兒曹親阿祖扯碎栗棘
蓬扶起雲門普且道承誰恩力咄雲從龍風從虎。

菴前種樹示眾喝一喝云善來諸仁發菩提心種菩提樹入菩提場證菩提
果卓拄杖云這一片地上世出世間莊嚴佛土自利利他輝今耀古猿抱子
歸芳草裏鳥啼花笑碧溪頭灼然山門境致陰濃綠樹涼兔懷胎不愧後昆
標格東門西門南門北門戍鼓分明儘可人天取則鬧市裏識取天子風流
出自當家百草頭薦取老僧壁立千仞橫按拄杖云截斷聖凡路頭如何通
信喝一喝云心空及第歸。

卓錫凌霄示眾云踢倒凌霄第一峰密移一步看飛龍三千樓閣咸稽首百
萬松杉盡點頭御愛峰起舞棋盤石倒走瀑布白練懸千尺引得鯉魚飛上
天不隨鶴去還伴雲眠拾松子煮寒泉刀耕火種擊竹歌蓮年年歲歲歲歲
年年更有一般堪羨處猢猻上樹尾連顛。

錢順宇張瑞甫倪仁毓茶話次師云目連至孝的證果富相造福的升天清
提有頭無尾墮在泥底不落因果不昧因果如何會取純陽點鐵成金黃龍
化金為土大機之用大用之機如何領略明得因該果攝便會用在機先一
著不來白雲萬里眨眼開眸古佛過去久矣若是善用心者說甚忠孝罪福
單單以個事為懷日就月將忽然摸著鼻孔原來原來雖然如是直饒恁麼
正好向天下知識手裏討棒喫。

顧君常玄公王明伯茶次中秋小參拈起拄杖云果能體露金風方許掛搭
更有個金風體露作麼生承當若道千江有水千江月腳跟下有甚交涉更
云萬里無雲萬里秋三十棒打折驢腰有甚罪過將謂性海無邊明似鏡白
浪滔天如何迴避若道無邊性海夜光浮踏倒燈籠略較些子曹溪指月馬
祖話月三千里外絕淆訛鷺鷥尋不見千手大悲勞而無功姮娥呈醜拙普
眼大士立地攢眉盡世界情與無情都盧打在明白裏苦哉佛陀奇哉達摩
且道山僧即今在甚麼處良久顧左右云諸人鼻孔裏還覺重麼呵呵大笑
歸方丈。

示眾喝一喝云大方獨步續燄禪燈打翻千七葛藤泥牛去後無消息不是
心不是佛不是物眉毛拖地太郎當腦後寒光千百尺餐蒺藜啖栗棘十字
街頭打桴桴撫背一文逢人乞前三三後三三樓閣門前竟日閑釣魚船上
的謝三郎相逢不相識大赦不下的載清風露胸跣足的與他棒喫且道
這老還會祖師西來大意麼以拄杖旋風打散。

檀越請開示師云既到三寶地上要作難遭之想佛乃慈悲父法乃救病藥
僧乃破暗燈盡世間人杳杳冥冥六根六塵六入六賊起倒相隨不肯少刻

放下被他牽入火宅百年三萬六千朝黃梁未熟天已曉鬢已霜齒已脫將調歡歌有幾時那知扼腕頓足悔之暮矣急須念佛念法念僧業海無邊回頭即岸乃豎起拂子云觀音觀音是汝諸仁入理之門喝一喝云惟此一事實餘二則非真。

中秋眾檀越燒夜香示眾云水晶盤子托出百億香幢薰裂人天腦蓋三世如來千花座上放此光明照徹微塵國土廣寒宮天鼓自鳴帝釋天搖唇鼓舌闡揚苦空無我四諦十二因緣觀音勢至四聖六凡各各顯出神通三昧天中來的菩薩合掌讚云希有希有人間來的菩薩倒退三千里玉露灑高梧金星沉碧海不負佳期要與現前諸仁造個劫國莊嚴種無漏因受勝妙樂設有個英靈衲子出來道老漢耄矣無端走入人天去也喝一喝云賴有這一路。

掩關示眾云我本山人直心行直行有佛處不肯住無佛處急走過隨墮類墮尊貴墮一向恁麼而今卻不然高懸藤笠束縛草鞋倒退三千北斗裏藏身拈一莖草蓋卻山河大地不愧先宗或現半身或呈一面曲為今時喝一喝云踞地獅子了無蹤跡金剛寶劍一味藏鋒探竿影草懶同時尚揔不作用出自天然遂以手作掩關勢云把斷要津四方八面來且道如何相接以拂子打○相云胡來胡現漢來漢現居士請開示師云生死迅速事不由人黃連未是苦業識茫茫真是苦急須努力回光返照是何端的眷屬一期途路相逢忽忽光陰蹉過紅日決定沉西去腳跟下事作麼生不須另立生涯便可將錯就錯子哭兒啼是甚西來大意喜怒哀樂好個塵塵三昧顛沛流連正是出頭時節剎那悔過遍界淨土切不可道佛無我分甘墮世諦流布修行如梓人刻木一般下得一刀一處空靈功不浪施如陶師治罌一般增得一些一處文彩拈弄摩挲剋期而成罪性本空因邪打正放下屠刀咄我是千佛一數。

陳奉坡曹俊明設齋元旦上堂云卯兔方歸辰龍出現舊店新開隨家豐儉一切現成何勞註腳十方同聚會個個學無為山僧直得鉗口結舌臨濟大師吐氣揚眉與現前諸人恭賀恭喜且道不落新舊一句作麼生連揮拂子云和氣一天梅吐舌春風四海柳開眉。

應三求徐子章王愛山張守溪顧紹江茶話次一居士問貪生怕死何得安樂師云生以不生生嚴臘水成冰死以不死死日出冰成水來的也是渠去的也是渠截斷去來相且道渠是誰喝一喝云但願空諸有何處不風流眾居士禮謝而退。

破關示眾喝一喝云鐵壁銀山當陽粉碎突出威音舊面目壓倒人天剎那三載彈指圓成八萬門普賢行者全體作用燈王如來颺下威光不是遍界難藏也要時人知有抖擻衲衣下青灰看取將來如何施設連卓拄杖云百千三昧應時來。

李瑞雲姚敬泉劉奉泉朱伯卿張公安等塑大士登龕上堂云道場歷劫座特地遭話墮莖草現瓊樓圓通無礙修機權與喜怒剎塵無二個全放與全

收隨處逞風流豎起拄杖云巍巍金軀丈六了又丈六且道無見頂相如何瞻仰取足擲下云直下來也。

菩薩入臍示眾師云盡三千大千世界是如來琉璃腹百億須彌香水海是如來碧玉藏經塵沙劫世出世間不增不減何須特地拈來重教安放雖然如是不免將錯就錯。

甲辰秋至新城示自光禪德生涯歷遍自回光明珠體露世無雙新城高價為舟筏舊國孤風作棟梁月下鷺鷥方展翅庭前柏子乍芬芳生來不染風塵色歸去來兮般若香露迴迴自超倫屋梁漏月見吾孫且道還知老漢落處麼還鄉盡是兒孫事祖父從來不出門。

白蓮寺陞座云五葉本同條白蓮藏珠玉聲價重金風幽香充一國舜若多神咬破指頭千手大悲摸索勿得咄種是威音那畔來切忌動著動著三十棒打折驢腰。

晚參師云諸緣屏息了直出古皇前不生無明草懶耕祖翁田松直棘曲鵠白烏玄說甚麼心空及第霜月孤圓活潑潑珠走盤飽嚼寒冰無他技冷笑猢猻夜[竺-二+欺]錢。

張敬川誕辰設供請開示師云松齡六十五長年不出戶福祿壽三星嬰兒不離母靈芝個裏栽先天為心祖知恩始報恩續得長庚譜諸佛非汝道誰是最道者父母非汝親誰是最親者酬德一句親何用之乎也且道如何是一句響喝一喝云桃熟千年樹識取個中仁。

晚參龔蔚彝羅奉泉陳睿宇居士求開示師云行無越住住無越行行住兩相忘行住裏薦取孤明歷歷廓然終始終始不二自閑閑獨露堂堂一著子咄會也麼覲面全提南針直指。

觀察大可錢公茶話次師云百千菩薩同一鼻孔萬億如來同一光中禪燈吹滅暗中行山僧不在明白裏且道居士如何得不違古觸今去士默然師云幾乎喚做你是個俗漢。

張敬泉居士塑佛開光請說法師乃喝一喝云撐開五眼如千日放出禪燈無盡光一一光中有一千葉蓮華一一華中有尊金身如來坐普光明殿轉大法輪天上人間莫不承此恩力且道說何法要喝一喝云腳下無私者同遊不夜天。

張敬川居士塑佛登座開光請說法師以拂子點空云劃破鴻蒙千聖吐氣揚眉大地眾生眼裏空花亂墜功沾九有澤被三賢解開布袋今日知有向上一竅如何領略不見敬川居士從頂至足八萬四千毛孔三百六十骨節處處金光煥耀正法流通在在處處不增不減且作麼生是個知恩報恩的消息復豎拂子云無邊法門百千妙義只向一毛頭上薦得依舊難描畫。

歸正圓通普說

師云佛種從緣起隨處立宗旨有緣佛出世無緣佛土滅處處化眾生猶如水中月佛說一切法為度一切心我無一切心何用一切法但有法所在即同有佛有佛安身龍天喜無僧說法鬼神愁佛者是前輩大聖人今說法者是小釋迦也現在僧是過去佛的弟子過去佛是現在佛的師長故所於有過去佛者亦有現在的佛也還有未來的佛是名三世諸佛過去佛者是昨日現在佛者是今日未來佛者是明日者也故為今之天地日月古之天地日月無二無別故此愚人說遠智人說近有智愚不等故有遠近之說在人不在法人有利鈍不同列剎將成四五工成少許汝等諸人不得重佛輕僧又不得信有為之因不信無漏之果山僧令汝等與相離相法上應捨莊嚴佛土者即非莊嚴其福無邊不可思議功德如人有日日光明照見種種色速得阿耨多羅三藐三菩提方滿山僧之願矣汝等再若重佛輕僧者住相而行布施如人人暗則無所見四相現前我人眾生壽者即是胎卵濕化難免輪迴頭出頭沒不得休歇苦哉苦哉金剛經云明明道一合相尚不可得但凡夫之人貪著其事畢竟斷疑生信絕相超宗方脫苦輪也敬佛不敬法大病不服藥敬佛不敬僧暗行不點燈敬佛又敬法苦口喫涼藥敬佛又敬僧福慧一齊增敬佛不敬師頑鐵不鉗鎚廢物成何器後悔難自追敬佛又敬師鋼鐵密爐鎚寶劍利鋒鋸安邦定國基師佛都不敬畜生餓鬼慶如油入麵裏萬劫喪本性佛法師不敬蝦蟆投深井汝若信我言即今就普請吐還肯麼汝若信不及甘自死在阱莫怪山僧好三寶深恭敬佛祖多來慶護法諸天喜歸源達本性供養佛法僧曉出日東昇能破諸障礙眾罪悉皆崩佛法僧不敬瘋癆蠱隔病此症最難醫甘心喪己命知過速須改因邪忽打正一念自知非超凡越四聖信者便是佛受者俱是法奉者真是僧又云信受奉行佛法僧行住坐臥任騰騰繁興永處那伽定常在那伽永處興豈不聞僧問臨濟大師如何是真佛真法真道乞垂開示濟云佛者心清淨是法者心光明是道者處處無礙淨光明是三即一皆空而無實有如真正道人念念不間斷達磨大師從西天來只是覓個不受惑的人後遇二祖一言便了始知從前虛用工夫山僧今日見處與佛祖不別至釋迦牟尼佛傳到我天童老和尚六十七世似青天白日一般佛佛授受祖祖相傳有何疑慮處有甚淆訛處山僧苦口再三奉勸汝等不得顛言倒語白日青天只管說夢重佛輕僧罪犯彌天不知不覺帶累汝等墮在我慢山中無有出期後悔難追莫怪山僧不道好當初調達謗佛至今在地獄中未得出脫汝等重佛輕僧也山僧請問你咄云走來佛是何等樣的面目是怎麼臉嘴要去著重他聾佛曾向汝等說話麼山僧不惜口業索性向汝等從頭至尾下個註腳喝一喝云佛身無為不墮諸數非青黃赤白黑豈但與汝等著重的麼凡所有相皆是虛妄或香象或梓木或增減二塑或金裝彩漆一切等相此乃莊嚴佛土也為中下二根建立者也中等之人見相而拜者更多下等之人見相而不拜者亦不少古德云三界唯心萬法唯識汝等信不及者我舉州中內外菴堂寺宇與汝等一一拈出了然明白只看大悲殿裏大悲菩薩即是頤

師啟造放生池上是驚菴師鼎建極樂大覺二庵俱是肖溪孔居士為首成置與詣大師一老師二位承任功成七八矣還有內外新舊大小等剎不可算數俱是僧家所為並不曾有泥塑木雕的佛像剎立者也故所以人能弘道非道弘人耳一體三身具足圓滿佛法僧名為三寶並不曾有外得者亦名自性常住三寶故所以自性常住三寶能建立世間常住三寶也從無相三昧中流出神通妙用建立世間無盡殊勝莊嚴功德引誘汝等發菩提心向三寶中成等正覺共證無生令汝等歸信恭敬三寶爾等諸人開口動舌無不是罪舉足動步無不是業忙忙業識無本可據造罪恒河沙作業滿大地向三寶前求哀懺悔仗佛威德之力拔除汝等萬劫千生罪根一時頓脫直趨無上妙道佛祖宿願而來度脫有情或頓者一句了然超百億或漸修者或起過法名者或三皈五戒者種種方便種種度脫者種種熏習汝等也知因識果俱是僧家攝授汝等貴在信受奉行名為佛子當行正道篤信無疑何故反謗師長錯認泥塑木雕的為佛輕師重佛此等之流真正外道邪魔地獄種子千佛出世不通懺悔汝等不得斬頭覓活豈但善知識師長分上一概僧道分中讚嘆者生福也無論老少貴賤悉皆不可毀謗他人隱惡而揚善名為佛子何況知識師長乎古德云寧可葷口念佛不得素口譚僧你看目連尊者證阿羅漢果清提老母打僧罵道至今不能證菩提尚不能脫塵汝等速須回向三寶反邪歸正復本還源此乃真語者實語者不誑語者不異語者是如語者大善知識高僧德重夙有願力飛錫而來娑婆世界建法幢立宗旨專為汝等令汝輩皈依自性常住三寶或三皈五戒名為根本戒亦名成所作智諸佛菩薩祖師俱從戒定慧中得超凡越聖的基本也與汝等說受者是佛說耶是法說耶是僧說耶汝等向這裏定當一回看汝若定當不出臨濟大師先說了也咄云無法可說是名說法耳就是儒教中大學之道在明明德中庸說不偏不倚之正道也唯有孔仲尼門下弟子七十二賢師師授受無聞毀謗師長者欺慢訓導者也決無此禮天地君親師四恩難報要人尊敬長上名正言順盡忠盡孝盡始盡終寧為忠臣烈士不可作佞臣賊子請看岳賢公精忠報國美名萬世秦檜夫妻臭名千載雲長公忠義後遇普淨禪師點撥頓超三界目連孝母獨證四果富丞相廣作福田積功累德還在天宮安樂受享清提夫人有頭無尾至今還在輪迴未脫善惡果報明如杲日絲毫誰昧純陽大仙拜見黃龍禪師超脫沙劫浮遊夢幻故以無師自悟者盡屬天魔外道古人大悟之後再見明師印證親近高德雖然如是各有時節時節若至其理自彰正當與麼時是如何喝一喝云還知落處麼無生法忍惟我空門中雖有龍蛇混雜凡聖交參無所不至無所不為甚多種種敗壞法門者亦不少種種露佈不可算數呵呵云還有大聖大賢大善知識闡揚大教者海內大剎普天匝地甚廣人所共知不言盡曉就是儒門中也有高上之士古今與來綿綿不絕不肖者亦有不是說道看了不肖者自生退屈難道盡是不法者麼也有高低不等只看維摩居士靈山會上三萬二千大阿羅漢無量恒河沙不可說不可說等菩薩飲食衣

服臥具醫藥悉皆供養種種如意文殊菩薩七佛之師與維摩問疾與釋迦牟尼佛無二無別故稱不二法門如今居士之稱莫作等閑看了既稱居士要與維摩一樣行事方稱居士既擔當居士名號不見僧家之過是名真維摩也過去者是古居士現在者是新維摩耳真正護法人不見三寶過護惜三寶者如護眼中之珠是名活韋馱也亦名護法諸天菩薩古德云天人阿修羅皆歸第一義要汝等斬新條令回向三寶永不退轉皈依佛法僧不是教汝等皈依有相佛即相離相離相見佛一體三身三身者何法身者是汝等自己清淨佛也報身者是汝等色身佛也化身者是汝等妙用神通自在佛也亦名千百億化身釋迦牟尼佛山僧與汝等下個註腳能淨即釋迦慈悲即觀音喜捨即勢至直心是彌陀平等即彌勒能說即文殊能行即普賢法華云開佛知見示佛知見悟佛知見入佛知見耳開示汝等悟入無生法忍所以種種言辭種種譬喻說三車在門外令汝等快出三界塵勞永離諸苦證安樂境界獨證真常恒不退轉種種布施種種供養種種莊嚴種種如意唯會一乘之道成正等覺與諸佛諸祖諸大善知識古今尊宿同一眼見同一耳聞同一鼻孔出氣把臂共行要汝等知過必改得能莫忘人身難得中國難生善知識難遇佛法難聞黃龍禪師云此身不向今生度更向何生度此身八十翁翁入場屋真誠不是小兒戲努力努力至嚙至嚙山僧坐視不禁只得搖唇鼓舌一片婆心牽枝引蔓不覺葛藤滿地一場漏逗忽有個傍不肯的出來拽下禪床痛搥一頓這裏是甚麼所在說心說性說黃道白山僧與他結個同參云感恩不盡把手牽君行不得惟人自肯乃方親。

大方禪師禪燈語錄卷一終

拈頌

世尊初生。

世尊眼空四海可謂旁若無人雲門令行千古未免傷鋒犯手這二老為人一個向高高山頂立一個向深深海底行看來也是同坑無異土。

四顧周行全體彰大方獨步勢無雙雲門一棒掀天地千古兒孫任舉揚

世尊明星悟道。

世尊夜睹明星大似開眼作夢說甚麼妄想執著證得證不得何不向明星未出時薦取何等勦絕更說甚麼智慧德相累及後人牽枝引蔓葛藤滿地。

抬頭忽覺滿天星大地眾生豁眼睛試問當年何所得和混合水向人傾

拈華微笑。

世尊拈華年老心孤迦葉微笑知恩有地檢點將來二俱不了海上座當時纔見他舉手處咄云不勞拈出免得後代兒孫承虛接響。

一枝拈出大家看百萬人天盡被瞞微笑頭陀親薦得燈燈不絕古今傳女子出定。

女子無端特地瞿曇隨人起倒文殊罔明各見一邊且道是那一邊咄若向這裏會得不勞彈指其或未然正好朝打八百暮打三千何故不合白日青天惑亂人家男女。

出定入定瞿曇正令瞎驢成隊不顧性命

世尊陞座文殊白椎。

世尊無風浪起文殊隨流入流總與他三十棒縛作一團拋向大洋海裏免得許多起倒何故諦觀法王法法王法如是。

月印波中徹底寒澄潭那許臥龍蟠五湖四海途中客盡被渠儂把釣竿

罽賓國王斬師子尊者。

大似靈龜負圖自取喪身之兆。

擲劍揮空勢不還翻身師子箭離弦君王手段天然別兩臂如何保不全

殃崛產難。

將謂黃面瞿曇有神仙秘密之方誰知只得一味平胃散待婆子欲產未產之時一口吞下瀉得肚裏乾乾淨淨免得饑廝煎餓廝炒雖然如是即如殃崛送語未到之際先已產下看這平胃散向甚麼處著落當時若問海上座有何法能免產難向他道覓女人相了不可得。

殃崛傳言是禍胎瞿曇一撥眼方開從來賢聖不曾殺母子團圞笑滿腮

城東老母不欲見佛。

老母不欲見佛可謂口吞佛祖氣宇如王雖然如是回顧東西總皆是佛甜瓜徹蒂甜苦瓠連根苦若向這裏薦得無佛無魔這裏承當不下一任泥堆加土。

東城老母大奇哉八面玲瓏正眼開大地眾生同一體個中那有二如來德山托鉢。

德山托鉢下堂垂鉤四海雪峰云鐘未鳴鼓未響托鉢向甚麼處去錦鰲衝浪來德山低頭歸方丈前箭猶輕後箭深峰舉似岩頭一人傳虛岩云大小德山未曾末後句陷虎之機山聞召岩云汝不肯老僧那好手中呈好手頭密啟其意紅心心裏中紅心山明日果與尋常不同殺人刀活人劍且喜老漢會末後句在據虎頭收虎尾如斯舉揚大似龜毛丈二兔角八尺錯下名言與末後句有甚交涉且道如何是末後句鶴有九皋方展翅馬無千里謾追風。

垂鉤四海釣獰龍衝浪錦鱗膽氣雄一釣雙鰲布大雨普天匝地起清風九峰因石霜遷化眾請首座作住持。

峰云若會先師意即住首座積功累德於生死岸頭去住自由甚為奇特爭柰未具正知見在向一色邊坐倒故以一條白練作死法會卻被九峰勘破一場敗闕當時若問海上座如何是一條白練去只向他道寒光爍爍射坤維待九峰擬議不來即便震威一喝云切莫辜負先師好總教九峰亡鋒結舌一代住持定是有分。

香煙堆裏露全身坐脫立亡據本真不是九峰虔侍者石霜一脈溺沉淪馬祖與西堂藏百丈海南泉願同玩月。

馬祖父子雖然舒卷縱橫各顯家風未免弄巧成拙海上座一一與他點出正好供養畫餅充饑正好修行泥裏洗土塊拂袖便行只成擔板獨超物外俺蘇嚙嚙娑婆訶復云這一隊不唧溜漢總被一串穿卻了也還有共相證明者麼三個猢猻夜[竺-二+欺]錢天明走盡空狼籍。

父子同心家業盛弟兄和氣世情長普天皓月千江印匝地清風四海揚南泉斬貓。

南泉全提正令趙州符到奉行二大老雖然臨時殺活縱奪可觀仔細檢點將來也是破草鞋還有與南泉把臂共行者麼舉手擊香几一下云一刀兩段俱揮盡大家活弄死貓兒。

一刀兩段絕疏親殺活全提互古今好手手中呈好手紅心心裏中紅心馬祖遣人送書到徑山國一欽禪師作一圓相。

馬祖到即不點國一點即不到諸人還識二大老麼一個鼻頭兩孔竅國師道欽師猶被馬師惑好本多同雖然如是不許夜行剛把火直須當道與人看。

馬師密叩徑山翁盡在空圓一點中無柰國師輕漏泄誰知千里有同風普化同臨濟赴齋掀倒飯床。

臨濟慣作白拈手段驅耕奪食普化到處徹底掀翻不留朕跡或有人問毛吞巨海芥納須彌為復是神通妙用為復是法爾如然只向他道龍得水時添意氣虎逢山勢長威寧。

驅耕奪食驗英雄盡底掀翻絕始終驚得主人渾喪膽毘盧頂上任西東
乾峰上堂法身有三種病二種光一一透得。

乾峰據虎頭雲門收虎尾雖然唱拍相隨拳踢相應未免通身泥水且道不落廉纖一句作麼生處處無私空合空法法皆歸水投水。

當機一句絕羅籠電掣星馳空合空二種光兮三種病眉毛睫上隔千重
馬祖因僧問離四句絕百非。

這僧與麼問大似二八女子不繫裙馬師與麼答也是憐兒不覺醜當時海上座若在請師直指西來意只向他道合取狗口更說甚麼藏頭白海頭黑且道恁麼批判還有優劣也無直截根源佛所印摘葉尋枝我不能。

四句離時全體現百非絕處露堂堂馬師何必空饒舌累及兒孫亂度量
乾峰舉一不得舉二放過一著落在第二。

雪後始知松柏操事難方見丈夫心。

乾峰舉處莫瞞肝具眼禪和仔細看覷透雲門關捩子轉身猶覺骨毛寒打鼓陞堂普請看雲門出眾被人謾乾峰落二回方丈各自歸寮倒剎竿

南院上堂赤肉團上壁立千仞僧問掀倒禪床。

院云這瞎漢這僧雖有冲天之氣且無入地之謀南院全提向上未免傷鋒犯手若有人問海上座問壁立千仞便震威一喝何等勦絕免得他掀倒禪床堪作箇甚麼。

赤肉團邊用最親主賓有理實難伸相逢盡道休官好林下何曾見一人
障蔽魔王領諸眷屬隨金剛齊菩薩云云。

師云謾別人即得大慧云既覓起處不得一千年隨從底是甚麼云疑則別參金剛齊云我不依有住而住不依無住而住如是而住云也要大家知法眼云障蔽魔王覓金剛齊即且從只如金剛齊還見障蔽魔王麼云青天白日不得說夢恁麼批判且道合古人意不合古人意即今莫有知海上座起處底麼喝一喝云人情盡處難留跡家破人亡四壁空。

魔佛空爭不識他金剛擊碎野狐窠迥然突出無遮障六臂三頭唱凱歌
雲門聞聲悟道。

觀世音將錢買胡餅放下手卻是饅頭領取鉤頭意舉手喝一喝云且道是聲耶是色耶是饅頭耶是胡餅耶若向這裏定當得出許伊具一隻眼若定當不出海上座自道去也復喝一喝云黃金自有黃金價終不和沙賣與人。

聞聲見色道明心廓露當陽手眼親收放縱橫由在我一回拈出一回新
波斯匿王問勝義諦中有世俗諦否。

佛云過去龍光佛波斯恁麼問含元殿裏更覓長安世尊恁麼答穿過髑
髏知音者少二大老與麼問答賓則始終賓主則始終主不落賓主一句
又作麼生一箭落雙鷗諸仁者且道無說無聞如何話會只向他道碗脫
丘又云碗。

主賓問答廓然傾兔角龜毛覲面呈兩眼分明對兩眼空爭魔佛可憐生

臺山婆子二頌

無柰臺山這老婆如何特地起干戈趙州勘破空饒舌堪笑行人錯過多
臺山婆臺山婆指點師僧能幾個突出叢林老作家歸來報道親勘破勘
破了沒來由帶累諸方成話墮

趙州訪二菴主二頌

到處逢人便下鉤大都好本共同酬等閑消息誰能測收放縱橫得自由
菴主拳頭豎最親趙州關捩少知音鴛鴦繡出從君看不把金針度與人

首山因僧問如何是佛山云新婦騎驢阿家牽二頌

新婦騎驢阿家牽首山一句老婆禪今朝特地重拈出六臂三頭任往還
新婦騎驢阿家牽覲面當機信口宣鄰舍喜逢今日至笙歌引送畫堂前

有句無句二頌

勘破為山老古錐葛藤樹上蔓支離禪床掀倒呵呵笑天上人間更有誰
笑倒為山這老魔大家胡亂唱巴歌泥中有刺誰能委烈燄堆頭長綠荷

萬法歸一二頌

萬法歸一一何歸分明直下廓離微祖師心印明如日爍破乾坤遍界輝
行腳師僧個問頭七觔衫子出青州句中若得真消息動地驚天出眾流

庭前柏樹子二頌

趙老庭前柏樹子蒼蒼自古蔭禪林參天踞地無人會摘葉尋枝直到今
庭前古柏翠幽幽直指禪人當下休無限婆心何太切五湖衲子豁雙眸

東山水上行頌

雲門拈出無生句諸佛分明絕覆藏無柰衲僧猶不薦東山水上亂商量

因徑山容和尚垂問文殊是七佛之師因甚出女子定不得師云
領取鉤頭意山云罔明因甚出得師云莫認定盤星山云鉤頭意在甚
麼處師便禮拜云請和尚歸方丈便行師拈云伸手原在縮手裏又云
高著眼頌云

誰家女子太無端定裏如何有許般今日從新親看破通身慶快骨毛寒

徑山索三玄三要總二頌

三玄三要句難分兔角龜毛眼裏塵玄要皆空非實有一番提起一番新
個中難透三玄要迴出威音那畔邊空劫已前高著眼臨機活潑任方圓

十智三玄總頌

十智同真三要玄看來好是火中蓮無端特地揚家醜良馬何須用舉鞭

臨濟七事十九首

奪人不奪境三十烏膝猶未省白日天光失卻牛春華爛熳鋪山嶺
奪境不奪人甜言蜜語未為真了然一句無多子語路分明好好陳
人境兩俱奪正令全提惡辣辣安南塞北一齊收獨坐寰中眼界闊
人境俱不奪雕弓已掛狼煙息鼙鼓打鼓祭江神野老謳歌忘帝力
金剛寶劍最鋒銳獨露當陽凜似霜退後進前身命喪總然佛祖也難當
踞地獅子忽昂頭百獸聞知伎倆休獅子林中獅子吼旃檀國裏獨優游
探竿影草定龍蛇帶角擎頭在此時是聖是凡明了了渙然不必更三思
一喝不作一喝用龜毛兔角千觔重無言童子口喃喃盡大地人提不動
賓中賓奔南走北外邊尋失卻衣中無價寶灰頭土面逐風塵
賓中主撞倒閑門與破戶金剛撫掌笑嘻嘻泥人扶起瓊樓柱
主中賓擲釣拋綸未得鱗撥盡江波徒費力倒拈寶劍入龍津
主中主正令當軒孰敢睹北海蒼龍吞卻珠南山大虫咬老虎
先照後用驗方來閃電光中赤手栽生鐵也須重煅煉金剛正眼頂門開
先用後照勘當人活捉生擒手眼親若是金毛重按過假雞肯放出關津
照用同時掌握全臨機潑潑驗愚賢單刀直入長蛇陣馬喪人亡血濺天
照用不同垂手時撫憐赤子令人思同條生兮同條死笑看雲山春日遲
一句當陽絕萬門普天匝地獨為尊十方沙界全身露佛祖都來一口吞

二句當陽觀面宣光明正大利人天迥然越格超方作普應高低絕正偏
三句拈來總現前四楞著地不須牽和泥合水隨高下南北東西任往還

賓主句頌

當堂齊喝大家知賓主分明在此時左眼半觔右八兩分疆立界本無岐

無位真人頌

無位真人出面門隨方瀟灑獨為尊三頭六臂擎天地歷歷孤明赤骨貧

三玄三要六頌

第一玄傾腸倒腹不能詮通身有口如何說眼裏聞聲鼻孔宣
第二玄耳中見色異新鮮鼻蛇吞卻南山鱉脫殼烏龜飛上天
第三玄不待臨時常現前是處綠楊堪繫馬誰家門裏灶無煙
第一要擬議思量總不妙抬眸鷓鴣子過新羅露柱燈籠撫掌笑
第二要一個鼻頭兩孔竅無舌之人善舉揚五音六律胡茄調
第三要杲日麗天無不到萬象森羅分外明燦破乾坤光晃耀

馬祖一喝三頌

非即非離證此時幾人到此用無疑耳聾三日兒孫廣千古流傳孰敢欺
一喝當陽遍界輝耳聾三日示全機大機大用流千古古今罕聞凜凜威
耳聾三日播家風一喝當陽顯大雄塗毒鼓邊休側耳兒孫亙古用無窮

閱歸真總義隨時頌出

叮嚀太殺啟無端本地風光托滿盤活鱗走盤珠有腳生機一路莫瞞肝
法法本來元不假頭頭顯露亦非真等閑識得東風面萬紫千紅總是春

閱真性決十則總頌

教外誰知有別傳無紋寶印印機先非凡非聖堂堂露無古無今常現前

拄杖二頌

赤條條不涉春秋淨裸裸何喜何愁活鱗鱗傍敲正打轉漉漉劈脊當頭
有時格外提持有時覲面相酬有時全殺全活有時全放全收拈起時天
回地轉放下時自在自由收放縱橫憑在我臨機應用盡風流
撐天指地一條杖凡聖都來總不放賞罰分明與麼行佛與眾生沒兩樣
殺活縱橫獨自由自由自在空無相無相光中絕點埃離諸名相真快暢

頌天童密雲老和尚二首

銅棺山頂駕虛舟情與無情白汗流慶快平生消舊夢無窮妙樂爽新秋
人天瞻仰都行腳大地齊歸拄杖頭打盡聖凡無敵手兒孫界滿蔭神州
雪月風花懶繫舟隨方瀟灑儘風流千江有水千江映萬里無雲萬里秋
凡聖同途休轉腳古今合轍個源頭潑天潑地誰能委正令全提覲面酬

明星悟道三頌

雪山六載駕孤舟午夜明星息妄流大地眾生開眼夢奇哉一切廓輪秋
九蓮臺上收雙腳百萬人中出一頭密密綿綿如是法師承授受古今酬
雪滿乾坤不繫舟縱橫宇宙轉風流孤輪霽色傾殘夢遍界清光萬國秋
大地山河齊赤腳森羅萬象盡抬頭頭頭物物皆成現剎剎塵塵彼此酬
凜凜凝霜葦作舟頂門一點凍雲流乾坤撥轉三千界宇宙掀翻九十秋
覲面不留元字腳當機誰敢弄虛頭作家手段天然別不動眉毛早與儔

頌二祖十一首

山河大地渡人舟撩亂天花眾道流赫日能消億劫夢廓然倒嶽盡傾秋
五湖衲子休行腳四海高流謾出頭面壁九年空碧眼神光隻手那能酬
大地漫漫白練舟水晶宮裏逞風流神光覲破塵沙夢妙湛圓明億劫秋
野鶴沖霄舒兩腳孤雲迴出萬山頭和光合轍隨高下普利群迷與麼儔
極目銀山望玉舟廣寒宮裏水雲流藍關路上群仙夢白帝城中眾鶴秋
跣足渡江雙赤腳披胸熊耳半山頭九年冷坐人難信紅雪齊腰猶未酬
現成公案不須舟隱顯縱橫順逆流日月星辰同一夢山河大地共千秋
香巖樹上懸雙腳更有天龍豎指頭須向此中端的得恒河沙劫悉皆酬
密雲堆裏駕孤舟水底清天翠欲流月載滿船消皎夢風恬浪靜碧潭秋
水窮山盡收雙腳撒手懸巖迴一頭活捉蒼龍全意氣生擒玉象不輕酬
雪映千山駕玉舟雲騰萬里逞風流身騎白鶴沖霄夢倒跨麒麟過漢秋
蔭覆兒孫千百億絲毫不隔達源頭通天徹地人難測曜古騰今滿界儔
浩滿乾坤一箇舟看來誰是我同流冰霜曉月毫無夢潔白身心當體秋
三世如來難下腳十方賢聖那尋頭晶輝朗曜微塵國一道清光亙古儔

本來個事不須舟妙湛圓明不動流作佛成仙重說夢超凡越聖更悲秋
虛空粉碎愁雙腳大地平沉憂白頭碧眼胡僧常面壁更無言句可相酬
大方獨步不程舟本有風光洞底流一榻清風無個夢忘懷歲月孰知秋
自由自在長伸腳無慮無憂石枕頭終日閑閑閑不徹不知何物可相儔
清波浩浩放孤舟愛水潺潺縱識流世事重重山疊夢人心曲曲水灣秋
勞勞碌碌誰停腳有有無無孰轉頭識得源頭無別水湛然常住洞天儔
我無生死我無舟人我俱無兩岸流中道不存誰做夢山窮水盡孰知秋
嘉州大象頻伸腳陝府鐵牛善舉頭八字打開人不識張三李四一齊酬

杲日麗天四頌

玄要三三無不周玄玄要要儘風流掀天揭地弘凡聖霧捲雲收大日頭
三玄三要如何旨劈嘴攔腮唯直指點出時人眼裏睛當陽獨露誰能委
十智童真直下鉤千妖百怪一齊收孰能識得根源去法法頭頭觸處周
十智童真碗脫丘一毫端上現瓊樓分明捉敗汾陽老始可全提正脈流

頌馬祖一喝三日耳聾二首

全機應用不雷同一喝當陽顯大雄三日耳聾方吐露兒孫千古播家風
霹靂一聲轟宇宙雷音迴別震乾坤大方獨步徵龍象正令全提無等倫

頌高峰大師四句偈五首

海底泥牛啣月走金毛獅子潑天吼無位真人跳上騎露柱燈籠笑破口
巖前石虎抱兒眠歲月俱忘知幾年因地一聲絕復甦機權喜怒任方圓
鐵蛇鑽入金剛眼覷面分明腦後箭急著眼兮拔卻箭回光一念超方便
崑崙騎象鷺鷥牽踏破虛空絕往還直下了然無別旨臨時殺活句中圓
舌劍高峰利似鎗妄將四句驗諸方誰知反被諸方勘兔角龜毛較短長

金剛頌

我人壽者及眾生四相皆空五眼明一合三心無所住超宗越格任縱橫

四月初八日頌世尊初生公案二首

今朝正是本娘生動地驚天日放晴帶累雲門喫白棒盲龜跛鳖一齊行
指天指地為人揚目顧周行別有長不是一番寒徹骨怎得梅花撲鼻香

為水牯牛二頌

日用尋常這一頭未知是馬未知牛一回端的通消息驀鼻牽來覲面酬
日日時時刻刻忘年年月月露堂堂悠悠蕩蕩瀟瀟洒刹刹塵塵處處彰

頌法身偈二首

山頭石虎吼如雷無位真人笑滿腮海底泥牛翻白浪火中木馬奔嘶來
觀音妙智暢奇哉五十三參顯善財龍女頓超無垢界參參見佛眾如來

法身頌四首

本來無假亦無真體露真常沒四鄰迴出一枝梅破臘百年公子不逢春
本來無物有何真真假假無憑喚甚鄰聖號凡名齊不立塵塵盡是本來人
我本無心那有塵一微塵內顯其真廓然迴出本來面正體堂堂沒卻身
靈靈不昧妙明明了了常知坦坦平湛湛澄澄無去住綿綿密密證無生

第一世南嶽讓禪師詣曹溪參六祖祖問甚處來師曰嵩山來祖曰什麼物恁麼來師無語遂經八載忽然有省乃白祖曰某甲有個會處祖曰作麼生會師曰說似一物即不中祖曰還假修證否師曰修證即不無染汙即不得祖曰祇此不染汙是諸佛之所護念汝既如是吾亦如是。

八載掀翻一物無說來一物轉淆訛頂門突出摩醯眼爍破乾坤耀古途。第二世馬祖一禪師在衡嶽常習坐禪讓和尚知是法器來問曰坐禪圖作什麼師曰圖作佛讓乃取一磚於庵前石上磨師曰磨作什麼讓曰磨作鏡師曰磨磚豈得成鏡讓曰磨磚既不成鏡坐禪豈得作佛師曰如何即是讓曰如牛駕車車若不行打車即是打牛即是師無對讓示偈曰心地含諸種遇澤悉皆萌三昧華無相何壞復何成師蒙開悟心意豁然。

一點當頭痛著鞭車牛闖破四禪天眼空宇宙渾瀟灑殺活縱橫絕正偏。第三世百丈海禪師參馬祖侍行次見一群野鴨飛過祖曰是什麼師曰野鴨子祖曰甚處去師曰飛過去也祖遂扭師鼻負痛失聲祖曰又道飛過去也師於言下有省次日祖陞堂眾纔集師出卷卻席祖便下座師隨至方丈祖曰我適來未曾說話汝為甚便卷卻席師曰昨日被和尚擲得鼻頭痛祖曰汝昨日向甚處留心師曰今日鼻頭又不痛也祖曰汝深明昨日事。

哭笑陞堂捲席回電光影裏不安排當陽一喝聾三日本地風光遍九垓。第四世黃檗運禪師參馬祖值祖遷化時百丈廬于塔傍師乃請問祖平日得力句丈舉再參因緣言老僧昔被馬大師一喝直得三日耳聾師聞舉不覺吐舌百丈曰子已後莫承嗣馬祖去麼師曰不然今日因師舉得見馬祖大機之用然且不識馬祖若嗣馬祖已後喪我兒孫丈曰如是如是見與師齊減師半德見過於師方堪傳授子甚有超師之見一日丈問甚處來師曰大雄山下採菌子來丈曰還見大虫麼師作虎聲丈拈斧作斫勢師打丈一擗丈吟吟而笑遂歸上堂曰大雄山下有一大虫汝等諸人也須好看百丈老人今日親遭一口。

耳聾三日示因由直下知歸吐舌頭喪我兒孫擔荷得傾湫倒嶽逞風流。第五世臨濟玄禪師在黃檗會中時睦州為首座勉令問黃檗如何是佛法的大意檗便打如是三問三度被打遂辭檗參大愚愚問甚處來師曰黃檗愚曰黃檗有何言句師遂舉前話復云不知某甲有過無過愚曰黃檗恁麼老婆為汝徹困猶覓過在師於言下大悟云元來黃檗佛法無多子愚擲住曰者尿床鬼子適來道有過無過如今又道佛

法無多子汝見個什麼道理速道速道師於愚肋下築三拳愚拓開曰汝師黃檗非干我事師回黃檗舉前話檗曰大愚老漢饒舌待來痛與一頓師曰說甚待來即今便打隨後一掌檗曰者風顛漢來者裏捋虎鬚師便喝檗曰侍者引者風顛漢參堂去。

六十烏藤不肯休三拳肋下豈輕酬歸來依舊風顛樣煞得滄沱正脈流。第六世興化獎禪師初為臨濟侍者後在三聖會裏嘗曰我向南方行腳一遭拄杖頭不曾撥著一個會佛法底人聖聞得問曰汝具個什麼眼便恁麼道師便喝聖曰須是汝始得後又到大覺為院主一日覺曰聞汝道向南方行腳一遭拄杖頭不曾撥著一個會佛法底人汝憑個什麼道理與麼道師喝覺便打師又喝覺又打來日從法堂過覺召院主我直下疑汝昨日者兩喝師復喝覺又打師再喝覺又打師曰某甲於三聖師兄處學得個賓主句總被師兄折倒了也願與某甲個安樂法門覺曰者瞎漢來者裏納敗闕脫下衲衣痛與一頓師於言下薦得臨濟先師於黃檗處喫痛棒底道理開堂日拈香云此炷香本為三聖師兄三聖於我太孤本為大覺師兄大覺於我太賒不如供養臨濟先師。

東家學得賓主句西家拆倒無依倚衲衣脫下赤條條便見先師喫棒意。第七世南院顛禪師上堂云赤肉團上壁立千仞時有僧問赤肉團上壁立千仞豈不是和尚道師曰是僧便掀倒禪床師曰汝看者瞎驢亂作僧擬議師便打趁。

掀倒禪床珠走盤當機覷面不瞞預棒頭有眼明如日要識真金火裏看。第八世風穴沼禪師參南院院問南方一棒作麼商量師曰作奇特商量師卻問和尚此間一棒作麼商量院拈拄杖曰棒下無生忍臨機不見師師於言下大徹玄旨李史君守郢州請師上堂云祖師心印狀似鐵牛之機去即印住住即印破祇如不去不住印即是不印即是時盧陂長老出問某甲有鐵牛之機請師不搭印師曰慣釣鯨鯢澄巨浸卻嗟蛙步[馬*展]泥沙陂佇思師喝曰長老何不進語陂擬議師打一拂子曰還記得話頭麼試舉看陂擬開口師又打一拂子牧主曰信知佛法與王法一般師曰見何道理牧主曰當斷不斷反招其亂師便下座。

棒下無生始半提鐵牛心印露全機傾腸剖腹人難會去住隨方絕是非。第九世首山念禪師晚居風穴會中穴勉擔荷大法師曰願聞其要穴遂上堂舉世尊以青蓮目顧視大眾乃曰正當恁麼時且道說個什麼若道不說而說又是埋沒先聖且道說個什麼師乃拂袖下去穴擲拄杖歸方丈侍僧問曰念法華因甚不祇對和尚穴曰念法華會也次日與真園頭同上問訊穴曰作麼生是世尊不說說真曰鵲鳩樹頭鳴穴曰汝作許多癡福作麼何不體究言句又問師師曰動容揚古路不墮悄然機穴謂真曰何不看念法華下語。

眉端上薦與多言拂袖下堂契本源古路悄然行一遍靈山正脈始流傳。第十世汾陽昭禪師歷參知識七十一員後到首山問百丈卷席意旨如何山曰龍袖拂開全體現師曰師意如何山曰象王行處絕狐蹤師於言下大悟云萬古碧潭空界月再三撈攬始應知有問曰見何道理便爾自肯師曰正是我放身命處師頌三玄三要曰三玄三要事難分得意忘言道易親一句明明該萬象重陽九日菊花新。

拂開全體正堂堂十智同真不覆藏萬古碧潭空界月三玄三要獨超方。第十一世石霜圓禪師謁汾陽經二年未許入室每見必詬罵一日訴曰自至法席不蒙指示念歲月飄忽已事未明有失出家之利語未卒汾叱曰是惡知識敢裨販我怒舉杖逐之師擬伸救汾掩其口乃大悟曰是知臨濟道出嘗情師後室中插劍一口以草鞋一雙水一盆置在劍邊每見人人入室即曰看看有至劍邊擬議者師曰險喪身失命了也便喝出。

觸著無明似未曾總然有理也難申白拈捉敗無多子道出常情意轉新。第十二世楊岐會禪師參慈明總院事每咨參明曰庫司事繁且去他日又問明曰監院異時兒孫遍天下在何用忙為一日明出師偵之小徑攔住曰者老漢今日須與我說不說打汝去明曰知是般事便休語未卒師大悟一日明上堂師問幽鳥語喃喃辭雲入亂峰時如何明曰我行荒草裏汝又入深村師曰官不容針更借一問明便喝師曰好喝明又喝師亦喝明連喝兩喝師禮拜明曰此事是個人方能擔荷師拂袖便行。

狹路相逢一著先深村荒草話難圓知般事了為貲本三腳驢兒信手牽。第十三世白雲端禪師參楊岐岐問受業師為誰師曰茶陵郁和尚岐曰聞伊過橋遭擲有省作偈甚奇能記否師誦偈岐笑而趨起師愕然通夕不寐黎明咨詢之岐曰汝見昨日打毆儼者麼師曰見岐曰汝一籌不及渠師復駭曰意旨如何岐曰渠愛人笑汝怕人笑師大悟。

無端一笑起潯訛親切鉤錐不用多翻轉面皮關鎖脫明珠一顆照山河。第十四世五祖演禪師參白雲遂問南泉摩尼珠話雲叱之師領悟獻投機偈曰山前一片閒田地叉手叮嚀問祖翁幾度賣來還自買為憐松竹引清風雲特印可令掌磨事未幾雲語曰有數禪客自廬山來皆有悟入處教伊說亦說得有來繇舉因緣問伊亦明得教伊下話亦下得祇是未在師遂疑私自計曰既悟了明得說得如何卻未在參究累日忽然省悟從前寶惜一時放下走見白雲雲為手舞足蹈師後曰吾因茲出一身白汗便明得下載清風。

通身白汗露珠流只用些些這藥頭祖父田園買賣了更憐松竹沒來由。第十五世圓悟勤禪師為五祖侍者一日部使詣祖問道祖曰提刑少年曾讀小豔詩否有兩句頗相近頻呼小玉元無事只要檀郎認得聲部使應喏喏祖曰且仔細師侍立次問曰提刑會否祖曰他祇認得聲

師曰祇要檀郎認得聲他既認得聲為甚卻不是祖曰如何是祖師西來意庭前柏樹子聾師忽有省遽出見雞飛上欄干鼓翅而鳴乃曰此豈不是聲遂呈偈曰金鴨香銷錦繡幃笙歌叢裏醉扶歸少年一段風流事祇許佳人獨自知祖遍謂山中耆宿曰我侍者參得禪也。

小玉頻呼一線通香銷金鴨眼初紅雞鳴撩起許相思搭在欄干九曲中。

第十六世虎丘隆禪師謁圓悟問見見之時見非是見見猶離見見不能及舉拳云還見麼師曰見悟曰頭上安頭師聞脫然契證悟叱曰見個什麼道理師曰竹密不妨流水過悟肯之有問曰隆藏主柔易若此何能為哉悟曰瞌睡虎耳。

拳頭舉起大粗生睡虎通身是眼睛竹密不妨流水過曹溪一滴振家聲。

第十七世應庵華禪師見虎丘侍行半載頓明大事丘忌日師拈香云平生沒興撞著者無意智老和尚做盡伎倆湊泊不得從此卸卻干戈隨分著衣喫飯二十年來坐曲条木懸羊頭賣狗肉知他有甚憑據雖然一年一度燒香日千古令人恨轉深。

聲香味觸辨縱橫官不容針車馬通密用全提誰解會父慈子孝立家風。

第十八世密庵傑禪師參應庵一日庵問如何是正法眼師遽答曰破砂盆庵頷之未幾辭白省覲庵以偈送曰大徹投機句當陽廓頂門相從今四載徵詰洞無痕雖未付鉢袋氣宇吞乾坤卻把正法眼喚作破砂盆此行將省覲切忌便躲跟吾有末後句待歸要汝遵。

當人掇出破砂盆價重須彌此話行更把葫蘆傾倒地難教收拾累兒孫。

第十九世破庵先禪師參密庵庵住靈隱師分座有道者請益曰胡孫子捉不住願垂開示師曰用捉作麼如風吹水自然成紋。

風旛不是虎頭斑鼻孔平空遭打翻血脈至今流不竭閻浮移在海南邊。

第二十世無準範禪師初謁育王佛炤炤問何處人師曰劍州炤曰帶得劍來麼師隨聲便喝炤笑曰者烏頭子也亂作後至靈隱破庵居第一座同遊石筍庵有道者請益胡孫子話師於侍傍大悟後開法一香供破庵。

因風吹水水成紋殺卻猢猻見太平明取烏頭端的處西川隆慶劍州人。

第二十一世雪巖欽禪師在無準會下每遇入室舉主人公便可[跳-兆+孛]跳舉衲僧巴鼻佛祖爪牙更無下口處此病礙在胸中十年後過浙東天育兩山偶佛殿前行忽然抬眸見一株古柏觸著向來所得境界和底一時颺下礙膺之物撲然而散始見徑山老人立地處正好三十拄杖。

掀翻柏子廓然醒突出金剛正眼睛百煉爐中呈伎倆團團輥出口通身。

第二十二世高峰妙禪師謁雪巖纔問訊被打出後凡入門巖便問誰與汝拖者死屍來隨即打出後因睹五祖真贊忽然打破疑情一日巖問日間浩浩時作得主麼師曰作得主巖曰睡夢中作得主麼師曰作得主巖曰正睡著時無夢無想無見無聞主在什麼處師無對遂奮志

入龍鬚越五載偶同宿友推枕墮地作聲廓然大徹自謂如在網羅中跳出元來祇是舊時人不改舊時行履處自此安邦定國天下太平一念無為十方坐斷。

枕頭撲落露尸骸萬戶千門一踏開幾度秋風歸未得抬眸忽地故鄉來。第二十三世中峰本禪師因觀流泉有省詣高峰求證峰打趁出既而民間訛傳官選童男女師問忽有人來問和尚討童男女時如何峰曰我但度竹篋子與他師於言下洞然徹法底源峰書真贊付師曰我相不思議佛祖莫能視獨許不肖兒見得半邊鼻。

竹篋現出童男相直下翻身洞底源鼻孔穿來只一半至今描畫不完全。第二十四世千巖長禪師見中峰峰問日用如何師曰念佛峰曰佛今何在師擬議峰厲聲斥之師求示法要峰授以狗子無佛性話三年因住望亭聞雀聲有省峰復斥之師憤然夜半忽鼠翻食貓器墮地有聲恍然開悟覺身躍起數丈如蟬蛻汙濁之中浮游玄間天地一時清朗復往質峰峰問趙州何故云無師曰鼠食貓飯峰曰未也師曰飯器破矣峰曰破後如何師曰築碎方甃峰乃微笑。

狗無佛性鼠生瞋觸著通身冷汗淋方甃盡情築碎了忽然開眼自知音。第二十五世萬峰蔚禪師謁千巖巖便問將什麼與老僧相見師豎拳云者裏與和尚相見巖曰死了燒了向何處安身立命師曰漚生漚滅水還在風息波平月映潭巖問不是心不是佛不是物是個什麼師以坐具打一圓相叉手而立一日普請斫松師拈圓石作獻珠狀曰請師酬價巖曰不值半文錢師曰瞎巖曰我也瞎汝也瞎師曰瞎瞎巖命師充第一座一日巖上堂舉無風荷葉動必定有魚行師震威一喝拂袖便行巖示偈曰鬱鬱黃花滿目秋白雲端坐碧峰頭無賓主句輕拈出一喝千江水逆流。

兩次三番爬著癢磕來砰去貴承當無賓主句輕拈出一喝轟天全體彰。第二十六世寶藏普持禪師萬峰付師偈曰大愚肋下痛還拳三要三玄絕正偏臨濟窟中師子子燈燈續燄古今傳峰臨入滅時門人問曰和尚會中幾人得法弟子峰示偈曰慈悲無念花開果熟因地分明慧寶致囑清徹源源一派流千古萬古來相續。

拳揮掌觸示端由玄要家風據令酬粉碎山河無剩跡風流徹骨有來頭。第二十七世東明岳禪師因睹松有省見寶藏具陳悟因藏斥之遂親炙座下一日藏問心不是佛智不是道汝云何會師向前問訊叉手而立藏呵曰汝在此許多時還作者個見解師乃發憤至第二日驀然徹法源底遂呈偈曰一拳打破太虛空百億須彌不露蹤借問個中誰是主扶桑湧出一輪紅。

打破虛空不露蹤頂門湧出一輪紅依稀似曲纔堪聽又被風吹別調中。第二十八世海舟慈禪師初於萬峰機下有省遂廬于洞庭山後一僧呵其見解師即棄庵詣東明一日明問曾見人否師曰見萬峰明曰萬

峰即今在什麼處師罔然明曰恁麼則何曾見萬峰師歸寮三晝夜寢食俱忘偶香燈繩斷墮地廓然大悟詣關前呈悟繇明曰老闍黎承嗣萬峰去師曰和尚為我打徹豈得承嗣萬峰明遂出關陞座曰瞿曇有意向誰傳迦葉無端開笑顏到此豈容七佛長文殊面赤也茫然今朝好笑東明事千古令人費唾涎幸得海公忘我我濟宗一脈續綿綿擲拄杖云千斤擔子方全付玄要如今拄杖談以拂子擊三擊下座。

燈滅繩斷賊身現腦後神光飛白練耀古輝今遍大千逢人拈出吹毛劍。第二十九世寶峰瑄禪師因海舟造塔院斧傷足有省乃充火頭一日負柴舟見曰將棘刺去作甚麼師曰是柴舟呵呵大笑師罔然舟曰是柴將去燒卻師遂起疑曰和尚畢竟是個什麼道理故爾問我是夕刻意參究不覺被火燎去眉毛面如刀割以鏡照之豁然大悟作偈呈舟舟便打師奪拄杖曰者條六尺竿幾年不用今日又要重拈舟大笑師又呈偈曰棒頭著處血痕斑笑裏藏刀仔細看不是英靈真漢子死人喫棒舞喃喃舟曰即此偈語可紹吾宗。

傷鋒別足痛無般燎卻眉毛更不堪莫向鬼窟作活計灼然一座白雲關。第三十世天奇瑞禪師參寶峰峰問甚處來師曰北京曰別有去處麼師曰隨方瀟灑曰曾到四川否師曰到曰四川境界與此間如何師曰江山雖異風月一般寶豎拳曰還有者個麼師曰無曰因甚卻無師曰非我境界曰如何是汝境界師曰諸佛不能識誰敢強安名曰汝豈不是著空師曰終不向鬼窟裏作活計曰西天九十六種外道汝是第一師拂袖便行寶乃付偈曰濟山棒喝如輕觸殺活從茲手眼親聖解凡情俱坐斷曇華猶放一枝新。

隔牆忽地喚哪哪箭入髑髏這老婆四百病中重拔出咬人獅子柰他何。第三十一世絕學聰禪師依天奇奇問苦樂皆心因何外取師曰祇為不了曰是非皆事因何妄承師曰錯認定盤星曰迷悟皆人因何不懂師曰早知燈是火豈向四方求奇乃付偈曰道者心同慈嫗心爭教赤子困群陰輔成架海金樑子佛缺方知補浩任師後居龍泉寺有僧問如何是本來面目師曰石香亭僧云便恁麼去時如何師曰喪卻了也僧問今朝孟夏八日天下叢林皆慶如來降誕之辰未審如來何處降生師於几上畫個圓相。

獨立沙場斑馬嘶幾回征戰淚沾衣不因途路南針指八陣如何得解圍。第三十二世笑巖寶禪師參絕學便問十聖三賢已全聖智如何道不明斯旨學厲聲曰十聖三賢爾已知如何是斯旨速道師下語不契一日洗菜次偶一莖菜墮水逐水圓轉捉不著忽有省遂攜籃歸學見便問是什麼師曰一藍菜學曰何不別道一句師曰請和尚別問來後與學圍爐次學曰人人有個本來父母子之父母今在何處師曰一火焚之學曰恁麼則子無父母耶師曰有即有佛眼覷不見師曰子還見麼師曰某亦不見學曰為什麼不見師曰若見則非真父母遂呈偈曰本

來真父母歷劫不曾離起坐承他力寒溫亦共知相逢不相見相見不相識為問今何在分明舉似師學深肯之。

急水灘頭徹底傾青天撈得對師呈一雙赤手無他計賊入空房解轉身。第三十三世幻有傳禪師聞燈花爆聲有省直造北方參笑巖求證巖曰汝將從前得力處一一說來師具實答語中間巖驀趯出鞋曰向者裏道一句看遂把師話端一齊打斷師通夕不寐明晨佇立簷下巖見喚師師回顧巖翹一足作脩羅障日月勢師當下脫然一日巖入堂曰我者拄杖要與人有要底麼首座曰某甲要巖曰汝要作麼座曰要他鏟斷天下人舌根巖以杖架肩曰榔栗橫擔不顧人直入千峰萬峰去師躍然下禪床曰恁麼須分付某甲往前迎取巖笑曰汝當久久執持一番始可打草去也乃贈一笠曰以此覆之無露圭角。

燈花燐爆夜叉頭隻履遭人截斷喉回首風前多意氣修羅面目太風流。第三十四世密雲悟禪師因挑柴過一山灣見一堆柴突露面前忽有省遂依幻有和尚脫白請益幻曰汝若到者田地便放身倒臥嗣後惟加罵詈師慚悶交感一日城歸過銅棺山頂忽覺情與無情煥然等現正所謂大地平沉底境界時幻遷北京乃往覲幻問汝有新會處麼師曰一人有慶萬民樂業幻曰汝又作麼生師曰某甲得得來省覲和尚幻曰念子遠來放汝三十棒師抽身便出一日幻問忽有人問汝如何祇對師驀豎拳幻曰老僧不曉得者是什麼意思師曰莫道和尚不曉得三世諸佛也不曉得又一日幻舉拂問諸方還有者個麼師震威一喝幻曰好一喝師連喝兩喝歸位幻囑師扶佛法師呈偈曰若據某甲扶佛法任他○○○○○都來總與三十棒莫道分明為賞罰。

中興濟北展經綸銅棺峰頭眼廓明陷落華山百二座棒頭敲出玉麒麟。第三十五世浮石賢禪師首謁湛然和尚湛問如何是佛法的大意師曰老老大大還問者箇話湛休去一日同諸禪侶閱五燈會元值七賢女觀尸陀林因緣有省遂說偈曰一池蛙鼓夜喧喧歷歷明明道口邊通報五湖林下客從今不必更加參次詣金粟參密雲和尚一日侍立次雲曰古人問如何是諸佛出身處荅薰風自南來殿閣生微涼汝作麼會師不能荅雲曰快還我下落師瞿然力參三晝夜連呈數偈雲俱言未在師自慚後有會處便入臥室禮曰某會也雲曰如何是汝會處師曰鷓鴣子過新羅雲曰未在還我偈來師即書曰薰風自南來殿閣生微涼我今看破處也只是尋常雲深然之。

七賢覲破銅山崩展翅鵬吞六合雲太白峰前高調在神州法脈暗流通。

牧牛頌

未牧

四蹄無力望空哮不辨東西路轉遙頭角縱橫昂意氣那知舉步犯人苗

初調

歪斜鼻孔強教穿動著些兒痛下鞭牢把繩頭無間歇日親日近不須牽

受制

一從鞭策受奔馳溪北溪南步步隨短笛無腔堪入耳晚山歸去竟忘疲

回首

望月江天掇轉頭山山春草飽堪休自從認得家園處煙霧橫眠影不留

馴伏

念茲在茲綠楊煙收放隨隨得自然縱使一朝無覓處依然不出碧溪邊

無礙

類類同途萬法如翻身直上戴嵩圖南泉活計乘時用雙角無欄樂有餘

任運

窗中躍出入雲中尾上煙霞色正濃帶月始從芳草去歸來又踏落花紅

相忘

渠無牧我我無渠饑向芳叢渴飲溪爛嚼清風忘歲月天荒地老未曾知

獨照

舉目無人在翠微東風嫋嫋鷓鴣啼西天朝去暮東土古澗寒泉祇自知

雙泯

海底行藏絕影蹤月穿波浪水含空清虛一道家風別描不成兮畫不工

偈上

和慈受深禪師披雲臺韻十首

慈受深懷老藥山二師並出始閑閑碧天皓月披雲石今古分明廓世間
披雲臺上看飛雲古往今來無二人嘯月吟風真個樂逍遙自在一閑身
雲臺自適任騰騰曠野遙觀物外明法法頭頭俱普現大千沙界廣長生
草木枝頭樹樹紅知因識果享無窮同生同死常安樂端坐巖前振古風
楚漢英雄各鬥攻明修棧道豈從容將軍戰馬今何在盤古江山夢幻中
雲水相逢問話頭高低普應眾禪流百川海納憑多少直指根源當下休
毫無餘念到人前土面灰頭寄水邊明月清風常伴侶和光合徹箇中圓
龍蛇混雜顯兒孫句裏藏鋒露本真獅子咬人盧逐塊聖凡獨脫迴尖新
本是無心何必休隨方瀟灑樂悠悠有為卻是無為好頓悟玄沙腳指頭
的意西來沒細粗顛言倒語費工夫天然一種平常事呂尚拋綸始得魚

和石屋禪師山居韻四十首

福城幽僻住隄西月滿池塘水滿溪開土且無驚險峻遊人何必論高低
盲龜自覺難離殼跛鰲誰知易墮泥翠竹產兒添意氣蒼松時有鳥來啼
笆籬門設未常關靜看雙輪幾往還憶昔曹溪曾墜石笑今時輩會偷閒
三三逐隊風波境六六成群人我山一切是非多不管常伸兩腳臥雲間
古塚荒丘長野蒿那分玉帶與金腰聖賢盡說歸山好今古多聞隱者高
透網赤稍冲碧浪開籠白鶴廓青霄老僧不管榮枯事冬夏春秋一破袍
碧池圍遶翠籬笆柏樹庭前謾喫茶太古風規真朴實今時學道尚驕奢
心空及第無生果性地恒開優鉢花室內紅塵飛不到悠悠自在野僧家
大道無形沒可憑出言吐氣要相應與心無事恒知足與事無心何減增
可嘆可悲名利土無榮無辱淡閒僧平常一味安居好不識諸人會未曾
靜鬧閒忙揔不差澄清絕點轉請訛真常流注西來意流注真常見也麼
斗室軒昂斜徑少笆籬寬闊向陽多饑吞栗棘渾無事閒對溪山野綠蘿
筴竹雙扉久不扃高懸一盞古禪燈金剛室內休言夢正法堂中謾葛藤
無說無聞真個妙有收有放本相應全機豁達元無定直透重關千萬層
三十幽居徑塢西腳跟下事更無欺春間花遍香茶筍秋季山多橡栗梨
虎嘯風生明月夜龍吟霧起曉天時同門兄弟分南北高臥凌霄更有誰

突出凌霄絕四傍明珠暉映振中央龍潭坎上朝陽暖獅子巖前歲月忘
穀雨已前茶葉細清明過後筍尖長靜聞鐘磬是非外未審招提在那方
謾說居菴便自由少柴沒米不無憂無知頑賴如狼虎晚進輕狂似馬牛
教汝活埋休露爪從余幻住且藏頭不如意處真如意信手拈來用未休
幻住凌霄頂上頭誰能把手共同遊登山負米來禪客過嶺擔柴有道流
白汗通身宜簡點紅爐片雪若能求諸人放下全無事何似山僧自肯休
宿露餐風在少年如今老覺更知艱向來人事隨離合直下時流絕往還
謾把絲綸浮綠水閒舒冷眼看青山有緣卻是無緣好百歲光陰頃刻間
山居漠漠竟無分幽谷深林蘭桂薰明暗色空非見見山河大地豈聞聞
長年懶得拈黃葉終日閒來臥白雲世上罕聞百歲滿諸人何苦更趨奔
一入荒山只學呆通身有口未閒開他非我是多休辯笑月吟風且樂哉
殿閣了然從此入薰風畢竟自南來三三前後分明舉無著徒勞到五臺
古澗流泉不見沙山巔蒼翠繞藤蘿風清月白長猿嘯霧罩雲籠少客過
嫩竹垂腰逢雪厚老梅瘦骨遇寒多孰知祖道寥寥寂今古分明自琢磨
三十餘年住小庵袈裟粉碎見檻毼枯椿倒盡添爐灶野果栽成有橘柑
本地風光全體現十方雲水競頭參如王氣宇當軒坐指捲當年長慶簾
說法天然有石臺不知何處得飛來遙觀瀑布蒼茫落四望雲端疊翠堆
峭壁難描三世佛孤巖易放一枝梅他方此界平如掌正眼看來沒點埃
斗室寥寥傍石臺長年寂寂戶常開當家種草尚難入義學沙門莫要來
獅子獨遊誰作伴野狐成隊世堪哀衲衣零落朝陽補黑霧紅霞快剪裁
淡霧雲籠幽徑深小菴日日碧沉沉閒眠竹榻渾無事靜坐明窗孰有心
虎嘯驚人山谷響龍吟大地播雷音翻天攬海機樞妙觀面全提絕古今
無憂無慮野僧家自在逍遙度歲華以此更無餘活計就中另有別生涯
祇園謾道無斑虎古路須知有鐵蛇庵內不知庵外事其如林下叫歸鴉
老僧鬢白瘦稜層一事無成百不能去歲毛團多盡起今年香芋又纏藤
松花餅熟應供客苦菜羹香聊飽僧開得池塘非待月半邊種藕半邊菱
填溝塞壑滿溪塘古往今來日夜忙站馬如飛謀仕宦貪榮冒寵及經商
一時快樂終非久萬劫辛酸地獄長富貴百年誰保守請君趁此早修行
客探禪房至槿籬失迎有怨禮深虧檻毼破衲髻鬆聚撩亂頭陀白髮披
入理深談亡彼此門庭施設待何時主賓觀面誰回互始覺咸言上上機
日日閒閒湛湛澄長年任運自騰騰個中消息曾無減那事如何得有增
僻處罕逢雲水客幽居希遇十方僧家私盡底向人說莫負山僧一片情
昨夜枕邊舊夢侵覺來卻值四更深全消億劫情塵執蕩盡河沙隔礙心
翠竹無風青寂寂蒼松有雨碧沉沉孤明歷歷非今古歷歷孤明亙古今
名利多憂不足跨清貧少樂野僧家心空不蓄無明草靜念長開優鉢花
翠壁籬邊抽嫩筍碧蓮池內沒浮沙我來二十餘年事每度軒窗送落霞
自入宗門不學禪水邊林下度餘年渾身破衲蓑衣掛跣足頭陀沒蓋纏
松竹滿山皆祖意鶴鳴空谷盡機緣夜來獨坐連雲石雲散長空別有天

三十年來自隱居千紅萬紫幾榮枯秋冬一味搜黃葉春夏尋常煮野蔬
一鉢充饑無個事圍爐得暖是工夫山僧適意嘗知足倒腹傾腸說向渠
石屋煙霞寄水邊長年出入自相便深耕曠劫三輪地淺種多生一片田
夜夜常貪月下坐朝朝獨愛日高眠自由自在何憂慮無是無非樂自然
深居崖谷為修行每日恒思克己評三業純和塵不染四緣無缺淨功成
饑餐白飯孤身健渴飲清茶雙眼明選佛選官真笑具山翁那肯掛虛名
踏遍溪山竟日尋荒丘得住勝嘉林蒼松夾道幽居遠翠竹重圍曲徑深
可嘆世間名利士馳求不歇喪光陰空花水月誰能識學道無難貴死心
老我無能落得閒悠悠一榻臥雲間法門茂盛多憂喜世道凋零更覺頑
日暖諸禽聲瑣碎風和花謝破蘭珊松花食盡黃精有正好安居懶出山
身貧道合掩柴門碧眼雙開八字分散步逍遙觀落日縱橫自在看飛雲
龍吟霧起聞無見虎嘯風生見不聞聞見俱泯忘對待見聞不立絕功勳
名山勝境結茅廬水便柴豐足有餘臘月行持勤向火春天操履懶看書
凝然湛寂空三際倏爾清寥鎮十虛了了常知無一事靈靈不昧獨山居
萬物無常孰肯推榮枯得失一盤棋浮生夢幻誰能覺曠劫塵勞若個知
一念知非心地印無心接物月臨池為人無出清閒好再不清閒待幾時
悠悠快樂野僧家活計隨緣自偶諧昨夜雨聲黃葉墮今朝風響送乾柴
庭前布滿擁南壁屋後憑空堆北崖與事無心真得趣人生何必巧安排
二六時中了了知長年如是若愚痴桑田滄海從他變石爛松枯更不移
兩眼遙觀千澗水一輪遠照萬方池人人不昧皆通達個個無欺盡可為
自慚沒福又無才媿我無能獨占呆土面灰頭只恁去銅頭鐵額任他來
生擒活捉憑收放正打傍敲勘幾回一雙碧眼玲瓏極兩個空拳另展開
方袍圓頂顯沙門盡是如來的子孫依教奉行調意馬聽經持律制心猿
參禪智鑒塵埃淨打坐靈明涵養溫一切時中俱不得個中消息沒疏親
法道凋零孰可摸小菴幽隱始良圖週圍翠竹深藏屋四顧清泉懷抱廚
老桂馨香園果熟菊開撲鼻稻方枯家田米飯乾柴草更有櫟糠煨地爐

扇頭吟二首

本地風光徹己躬靈鋒施展廓玄窮遮天掩日無窮極覆地藏山迥不同
三十三天曾[跳-兆+孛]跳十擒十縱顯威雄這般妙用誰能測盡在渠
儂信手中

拈來無不是薰風殿閣微涼透己躬當體無依真快暢通身脫洒樂無窮
森羅群象憑收放日月星辰掌握中撥轉虛空弘祖道掀翻大地迴全功
逍遙任性無遮覆遍界難藏個主翁

滿關偶成

迴脫無依最上關總教佛祖也難攀千賢瞬目空懸望萬聖揚眉絕往還
歲月忘懷心蕩蕩時光懶記性閒閒有人若問其中意白髮頭陀開笑顏

偶占

無慮無憂即爽神一毫不假自然真豁開頂眼奇男子鼻孔摩霄能幾人
上古無端空斷臂而今只得坐微塵盡云西意傳來遠誰識心花一段春

迎年

連天爆竹壯精神粉碎虛空沒假真宇宙渾然同箇體乾坤洞達只斯人
燈花彌滿三千界雪月和光迴剎塵更有一枝梅破臘馨香不是洛陽春

詠梅八首

臘裏寒梅花有神瓊枝玉骨露天真風霜叵賴誰同傲雪月相依絕點塵
浮動暗香亡舞蝶淺清曉色有遊人謾言藉此東君令先占芳魁劫外春
普應高低妙入神參差長短未為真紅紅綠綠枝枝現淡淡濃濃樹樹塵
正眼豁開這著子心華洞達個中人和光合轍週沙界一體同觀大地春
笑傲乾坤物外神縱橫宇宙播家真眼空大地渾無物鼻孔撩天不染塵
雪覆千山非一色月臨萬水映斯人生平不借東風力本有心華一段春
臘裏梅花瘦有神豁開正眼見其真一枝獨秀經霜雪五葉芬芳絕點塵
最顯西天初祖意惟明東土再來人二三四七無窮數撲鼻熏香萬古春
老梅初發爽精神只要時人識假真凡聖二途休錯認古今一道迴埃塵
分明一段苦心事偏向枝頭說與人雪嶺泥牛能哮吼驚天動地廓然春
筆尖流出一毫神赤白青黃紙上真少有淡濃飄細雨多因老嫩洒微塵
依希好似枝頭鳥彷彿難憑樹下人點墨畫圖成舊蹟鋪花簇錦顯奇春
不會吟詩不損神無言無說自天真高低長短通非礙左右逢原遍剎塵
蕩蕩無依箇面目單單流露本來人無端特地空饒舌漏泄枝頭幾點春
無影枝頭少有神何須向外別求真惺惺寂寂還同夢歷歷明明不惹塵
碧眼豁開忘歲月眉端突露本元人斷梅雪夜傳消息難昧先天一段春

省幻四首

兔走鳥飛逐炎涼流光迅速可悲傷百年春夢多無實萬事空花有幾長
假合四緣成幻泡大開雙眼徹朝霜棚頭傀儡千般巧普請諸人細自量
虛生浪死好思惟三界無安無久居個個滿懷千載計人人欲保百年期
貪心無厭忙如箭誰覺流光去若飛一去不來伸兩手塚邊添得塊新泥

無常迅速定期難白日挑燈魂夢間頃刻光陰如拂電剎那歲月似潺湲
達人得意先知退智者明心正好還返照迴光須及早莫教空惜鬢毛斑
為人在世不歸山甘喪殘生醉夢間念念合塵心自昧時時背覺妄緣攀
千思計策無為好萬巧何如一個頑妙湛圓明休錯過電光影裏透重關

城居

個事分明已斷疑灰頭土面市城居掩關活計閒無比閉戶生涯靜有餘
格外知音逢者少同門相契到菴稀寥寥終日無為話寂坐常時送夕暉

閱詣南頓陳二大師除夕偈依韻荅之

捧讀佳章瑞氣伸始知梅柳報芳春堂開繡雪鯤鯨化杖震婁江勘主賓
活潑天機成大廈軒昂頭角戶門新謾云物理難^賡頌聊寫俚言笑倒人

再和詣頓二大師原韻三首

爪牙雖備未曾伸坐斷寒崖萬古春百怪聞知都遠去千妖迴避杳無賓
河清海晏年承舊國泰民安歲月新瞬息百年誰覺老流光易度暗催人
青山密密把頭伸綠水綿綿報好春大海澄澄通達主長江湛湛送迎賓
魚龍一一隨波躍龜鱉雙雙逐浪新海岳掀翻無點滴天關撥轉有奇人
金毛哮吼急翻伸布爪張牙吐露春獨步寰中無二主橫行海內沒雙賓
騰今耀古年年燦動眾驚群歲歲新萬國同歡匝地土千邦共慶普天人

因事偶成六首

學道先須忘利名利心死道方明明心見性稱豪傑得本還原顯大英
眼中瞳子面前呈鐵壁銀山沒處行腦後圓光千萬丈眉毛仍舊額頭主
隨緣渾日聽天行消遣時光度此生寧守清貧常自足無求最樂任縱橫
百千諸佛及眾生煩惱場中假立名凡聖二途休取捨化城寶所悄然行
千言萬語為君宣何故昏迷反倒顛富貴百年渾一夢閻羅那怕有銀錢
肥魚大肉喫多年鵝鴨雞豬載幾船本利算來誰肯讓一刀定是一刀還

示超宗

山僧苦口勸修行得失榮枯快自評富貴只因多作福端嚴相貌豈天生

示人公案八首

現成公案人難會亙古及今達者知過量人行過量事從來寸步不曾移
現成公案快承當直下無難全體彰世出世間明了了堂堂獨露寶華王
現成公案沒商量劍樹刀山總道場爐內鑊湯無避處誰知當體是金剛
現成公案直如弦看破方知火裏蓮好似紅爐一點雪大都海口不能宣
現成公案示無傳覲面當機豎個拳無奈婆心何太切傾腸倒腹為人宣
現成公案劈頭攢碧眼胡僧沒處鑽鐵壁銀山無出路泥牛石虎膽驚寒
現成公案本無生一大藏經是假名四十九年無法說一華拈出了然明
一枝拈出要人明頓發心華笑裏評笑裏藏刀全殺活單刀直入證無生

閱歸真總義

叮嚀太殺啟無端本地風光托滿盤活潑走盤珠有腳生機一路莫瞞肝
法法本來元不假頭頭顯露亦非真等閒識得東風面萬紫千紅總是春

指示迷塗二首

諸佛何曾為自求捨身命處更無愁三心不得皆通達任運騰騰與麼流
山僧不為自家求普勸諸檀息閑愁富貴功名誰保守百年社稷付東流

閱古德種田語和韻四首

退步方知祖父田六根通利達先天現成公案重拈出大道何曾有後前
嘆惜諸人插野田可憐水底去撈天牽枝帶葉何時了佛法如何得現前
十方常住小坵田大地同栽奉佛天四聖六凡共一飽大家齊證未生前
若人識得這坵田供養恒河沙佛天剎剎塵塵俱普利世間世出儘週全

和中峰大師警世偈二十首

多因未了入胞胎帶水拖泥去復來總被境緣遮道眼不知何劫得忘懷
動心俱是輪迴業繫念乖真生死根背觸不分常一道看來是個鐵渾淪
諸人若解機先語無字真經始可書千手大悲難摸索通身有口沒分疏
貧人輕賤富人驕滿肚無明把自燒劫火洞然毫末盡誰知半點不相饒
貪嗔癡愛正匆匆欲火交煎意轉濃白日青天真見鬼明明自昧主人公
逆生煩惱順生歡天上人間總一般順逆場中高著眼英靈休把自心瞞
道眼未開渾是夢迷雲覆閉黑漫漫靈明妙覺無遮障二六時中莫自瞞
歲月遷流暑復寒諸仁休戀六華村獼猴若不惺惺著到處塵勞生死門
休把良心埋沒盡何須分外立規模如蚕作繭誇精進辜負西來個老胡
饑餐渴飲冷添衣盡大地人合共知歷歷孤明誰不識云何開眼縱嗔痴

千千萬萬說青黃那個男兒是當行問著主人公落處並無一個肯承當
臃腫老朽鬢鬚班兩耳昏聾腿又酸氣力毫無伎倆盡由他變態有多般
因緣勾引至娑婆果報分明柰若何知事少時煩惱少識人多處是非多
幻生幻滅海中漚和底掀翻豁兩眸自古海枯終見底人心未死意先抽
傳盃傳盞名三奠為個髑髏猶未乾流識不知何處去石人含淚膽驚寒
或燒或壙或墳埋幾度荒丘狼藉來白骨似山誰保守勸君不必巧安排
和身脫下娘生骨今古從來有變更若向此番乾得盡再無移動再無行
英靈那肯受人欺氣宇如王勢出奇衣裏明珠全不薦得便宜是失便宜
牛頭馬面閻羅老共轉如來正法輪劍樹刀山同等覺更無餘事可相親
生死死生俱有分百千賢聖悟還迷知迷正覺通三際驀地抬頭日又西

示本弘

如來妙道為人宣事理融通廓正偏無住法中能普遍光明正大奉天然

顧玄公居士

聖賢作福貴通玄流水滔滔海納川普應高低同合轍和光洞達任方圓

和栴堂禪師山居十首

撒手懸崖擲杖黎自由自在任施為吹毛出匣如霜刃利刃磋磨白壁玼
栗棘蓬吞空萬物金剛圈跳迴千岐興來獨步玲瓏石懶去溪邊採紫芝
日輪東出又西斜迅速無常謾自誇堪笑堪悲人面虎可羞可恥佛心蛇
千方思算皆虛妄百計求謀總幻花名利場中休久戀翻身一擲透煙霞
一切俱來不可得三餐茶飯敢辭勞大千沙界輪雙翼百億須彌轉一毛
作佛成仙賢聖喜天魔外道鬼神號法門障礙皆如是不採無窮隱者高
一念無為忘去住個中誰喜復誰憂虛空粉碎君須證大地平沉絕學修
兩腳長伸眠白日翻身靜聽一聲鳩方知大士無言說始信橋流水不流
初秋陣陣送風涼老桂新開香滿房七處徵心重說夢八還辨見轉生狂
三心不得千差悉一念空時萬法忘臨濟三玄併料揀同真十智出汾陽
外息諸緣內絕求翻身更上一層樓從空放下知端的始信尋常這一頭
休說子湖凶惡狗謾言王老狠狂牛百川海納皆歸順一喝千江水逆流
末劫眾生難挽回撥無因果實堪哀專精妙道超凡骨善守貧窮養聖胎
無著當機開雙眼清涼觀面舉茶盃三三前後知多少童子難分雪裏梅
城郭園中結短蓬自來盞飯米無春閒時慣打嘉州象鬧裏勤敲攪海龍
盡說庭前千歲柏誰知戶後萬年松雖然標格叢林榜堪笑盲聾甕作鐘

個中若了全無事這個從來也不消露柱無端先合掌燈籠特地手空招
泥牛入海翻波浪石虎奔山踏斷橋兩岸豁開忘去住無憂無慮混漁樵
問疾毗耶不二門離諸問荅絕思論無言無說鎔凡聖非古非今徹果因
三萬二千獅子座恒河沙數法王尊默然一榻俱收盡丈室能藏百億孫

訓後學志行品

既到三寶地上要作難遭之想預先立志孤高然後道心寬廣善扶架海
金樑豎起撐天柱礫當為萬世規範堪作千秋標榜時時意氣和同刻刻
胸中坦蕩行事小心謹慎不得粗浮鹵莽通達隨處作主切莫成群結黨
與人解黏去縛不得自投羅網因緣自有龍天不必苟圖勉強依我這般
行持人天自然瞻仰有日果熟香飄安樂必然後享

懸匾額

萬年香火一禪燈匝地普天人仰登百億須彌皆共照如同曉日正東昇

監院朗真請讚

海闊魚龍隱天空顯朗真禪燈親授記尊重汝為人覲面無回互當揚獨
露身大機全大用縱奪爽精神喜怒誰能測雷音播剎塵
大方禪師禪燈語錄卷四終

偈下

訪雙林山幢大師讀弘覺老人留題和韻

高人貴隱最危峰久闊疏來猶疊重千里同風常覲面萬途合轍沒遮樺
生擒帶角青山虎活捉含珠碧海龍秋月後臨丹桂淡小陽前至菊方穠

安三世佛座

坐斷崑崙第一功毘盧頂上稱英雄普天匝地威風廣始可全提正脈通

圓通應化入藏

塵塵實際本和同運出諸檀信手中千眼豁開皆普現玲瓏活潑妙無窮

示參禪四首

參禪須鐵漢提起吹毛劍截斷死生關突出本來面
參禪須真參悟須要實悟迷悟俱打脫豁然超佛祖
參禪無別說生死須要切踏破上頭關獨證無生滅
參禪最直徑掇出軒轅鏡好醜自皆知明心達本性

又示參禪四首

參禪朴實要真參參到無參絕往還一念不生當體現頓然直透祖師關
參禪奮志貴新鮮抖搜精神絕蓋纏返照迴光終看破始知父母未生前
參禪切忌去貪眠別起眉毛捏兩拳憤到懸崖方撒手翻身打破趙州關
參禪直下了無生踏著無生生不生了了明明明了了毘盧頂上任君行

西徑山八景

天掌峰

如天普蓋迴群峰大地山河掌握中整舊巋然成寶殿重新托出鎮長空

雲筆峰

筆尖鋒利寫青雲五色霞光分不分文彩縱橫舒妙用虛空圖滿點無痕

峨眉峰

峨眉額上有明珠突出高標耀古途開合自由惟在爾遙觀曠劫後來蘇

萬菊軒

萬菊重栽脫體彰風從花裏過來香象王室內誰賓主獅子軒中孰舉揚

浣雲池

輝天鑑地盡圓通合水和泥印碧空萬壑拱朝如海納千年常住翠微中

驪珠峰

布雨興雲起臥龍珠輪撥轉半空中當陽獨露無遮覆亙古彌今獻梵宮

迎暉亭

大地漫漫慧日昇山河燦燦悉皆明森羅萬象容交徹月白風清若個迎

鰲魚石

金鰲騰躍體剛堅獨臥雙林更不遷燦爛峰頭吞日月眼空四海鼻撩天

和曹溪憨大師韻

滴水源同海千途迴化城天高星影淡地曠月光明懶睹有為法勤看無
字經塵塵俱了達半偈證無生

示老不回頭

雪屋離披破漏舟東坍西倒處風流迷雲覆蓋千生夢障霧含藏萬劫秋
鶴髮婦人速歇腳霜鬚男子快回頭雪山諸獄寒冰地慧日能消頃刻傳

示眾

撩亂天花汨沒舟塵緣瀾滿不通流貪嗔未了天長夢解脫空無地久秋
鶴髮老翁好住腳鷺眉長者早回頭高超十地真豪傑越格英靈獨步儔

過臨安訪楊懷眉明府喜建新署

光明百里眾宣揚勿用公家一粒糧堂閣重重新畫彩樓臺疊疊體全彰
安邦越格民無恙定國超群士有望千載留題碑載道君臣底句意偏長

祝徑山費老和尚六秩

金剛齊壽並師肩師比金剛壽愈堅無我無人超四相有權有實越三賢
諸天共集看揮塵七眾俱臨奏沒絃大地兒孫同慶頌當軒踞坐老金仙

付觀察大可錢

一條拄杖贈英雄二諦融通大可翁捩轉天關無上下掀翻地軸沒西東
發揮臨濟三玄要鏟蕩汾陽十智同打盡聖凡誰敵手全提正令闡綱宗

和張拙秀才見道韻

無邊真照遍恒沙情與無情共我家九有四生同一體六通三昧迴無遮
靈機活潑忘高下妙道縱橫沒正邪世出世間無罣礙真如佛性眼中華

奉慰王書翁護法時在佛山二首

絕後甦來事事餘始知身外盡空諸突然驚散羅浮夢杲日當空照雪書
權宜方便示多門入理深談翁獨尊離合悲歡推歲月清晨日午又黃昏

顧仰溪居士持祇園魯公見道偈次韻四首

一擊超方忘所知渾然觀體有何疑大圓寶鏡懸空挂歷歷孤明照不欺
月映千江印水湍汪洋湖海九洲寬海底泥牛吞日月拈起牛頭尾上安
平沉大地原非水白浪滔天沒點痕臨濟三拳踞返擲雲門一棒報師恩
古今好本大多同赤白青黃共紫紅始顯五宗通合轍和盤托出現金容

維摩曉日

曉出扶桑海底紅騰今耀古振長空十方沙界維摩座百億須彌一榻中

山居口占二首

山居百事不干懷早去鋤園晚拾柴趺坐起來閑補衲饑餐渴飲自徘徊
山居日用懶修行步入雲霄一坦平是聖是凡渾不管呼魔喚佛任他爭

贈太平寺祥符關主出關

掉臂竟行非好手關前罷問未為能天然一種平常事踏著平常還未曾

贈澄菴關主出關

有理無言何處伸敲枷打鎖出關津機先若問關中事畢竟將何指示人

王俊翁居士呈偈荅之

一點靈光個個同多因迷失在其中若能返照通無夢彼岸親登這老翁

示本弘菴主

淨極圓明獨露真翻天覆地播家珍頭頭法法皆真現正體堂堂沒腳伸

示獨覺二首

雪滿長空不見舟微塵國土任縱流平沉死水浮游夢性海掀翻正值秋
匝地寒風浸兩腳普天浩月廓人頭琉璃殿上無知識瑪瑙階前有應酬
天共白雲個曉舟水含明月兩和流掀翻本地風光夢迴出先天皎潔秋
半個蒲團安我腳一條拄杖過人頭高提正印憑拈弄手眼通身恁麼儔

天童師翁密老和尚題金山和韻

白浪滔天迴出頭洪波浩蕩截中流古今度盡人無數獨坐江心覷小舟

祝雪竇石奇老和尚壽

虛空同壽本齊年極目遙觀孰在先明覺家風重話振天童正脈賴師傳

贈錢履卿護法

隨緣放曠不知旬物外應知大地春明月清風常作伴世間世出一閒人

隨費老人住維摩偶成

獨坐虞山第一峰大觀江海沸重淙播揚解惑弘嚴統流注真常演濟宗
樹古普天人浩仰林新匝地儘歸從默然一榻俱收盡翅轉鵬搏不見龍

侍老人過溧陽萬古寺

脫體無依本自圓單提直指利人天慈雲彌布千峰外法雨均霑一著先
電激雷轟全正令旁敲正打廓塵緣大家共唱無生曲覲面堂堂出格禪

和百峰兄禮祖塔韻

巍巍寶塔插高岑欲禮從教步翠林佇立纔思遠祖跡低徊忽送幾松音
堆珠似拜鵬搏下明月如懷晏坐深歷歷孤明誰昧得天長地久覆群陰

警同衣二首

欲見靈機破本參本參一破始深諳當人任性當人委自肯泯心自肯甘
覲體全空正法眼寸絲不掛別何談本來無物曹溪旨萬古宗風顯嶺南
禪心全放亦全收順逆高低普應酬凡聖二途俱不立古今一道儘風流
掀天揭地誰為伴捉象擒龍縱意求若有這般真妙手毘盧頂上任君遊

示頂覺

雪滿長空懶放舟和光任運不隨流金輪天子寰中旨鐵甲將軍塞外秋
瑪瑙階前親下腳琉璃殿上獨昂頭君臣道合猶賓主野老謳歌絕唱酬

和瑞洪禪師遊五臺山韻

翠岩南臺

南臺擁翠迴群峰亙古彌今獻梵宮萬載無移恒不二千年圍護主人公

挂月西臺

峨嵋挂月照西臺白象雲端睹未來鼻孔撩天誰肯薦青毛抖搜笑顏開

協斗北臺

斗轉星移萬仞峰天關地軸野奇逢高賢到此休停腳就路還家遇祖翁

錦繡中臺

中臺錦繡暢奇哉帝釋天宮奉獻來七佛之師全體現驚群獅子口長開

和雪萍法師念佛四首

生緣何必苦奔忙忙裏抽閒至佛堂一句彌陀通淨土六方盡是我家鄉
老年無事一閒身身外無餘休問津自性彌陀當體現人間天上是能仁
病因貪愛縱嗔成三業堅牢是苦情一念回頭全體佛總教四海盡澄清
死死生生念不忘一尊古佛要承當從知夢幻多圓覺頓發心蓮撲鼻香

種樹成林

寶樹成行現剎前斬新條令迴天然根盤劫外靈枝茂葉覆娑婆蓋大千

和雪寶石老和尚韻

撲鼻馨香不自誇一枝獨秀足生涯昔年太白人瞻仰今日重開優鉢花

宸安護法至菴[言*奉]經

忙裏抽閒真道場殷勤頂禮法中王千華臺上黃金相箇是蓮邦脫體彰

贈陸伯貞居士

寶杵全提大有威魔軍膽喪避如飛奉公不二扶三寶行所難行世上稀

贈石君用居士

春風夏雨果因中七寶蓮開燦子隆宿世栽培今又勝功圓瞥地豁然通

贈顧君常居士

似天普蓋獨君常一念迴光迴十方諸上善人常聚會灼然世世福無疆

贈穆瑞芝居士

聰明世諦占鰲頭順逆波中能放收識得源頭無別水縱橫自在任悠悠

贈倪仁毓居士

舌利心慈絕異同人天叢裏獨英雄春回斗轉知端的任運騰騰顯汝功

示世愚癡

終朝情切喚頻頻昧卻靈山箇本人口氣不來空兩手百般惟有業隨身

示劉奉泉預修

齋主告虔還受生一鋪功德謹隨身當來欲證無生果直下須除有漏因
他化天宮休錯認親登寶所在斯人從來佛法無多子一片婆心為汝陳

過建平訪石丰法兄

報恩別後各西東此地今朝又得逢片片慈雲傾大雨冷冷甘露洒長空
高低普熟人情舊培植多收祖道隆老我不吹無孔笛相看合掌異中同

贈頤陳禪師

霜凝冰潔白雲堆錦上鋪花浪湧催月照樓臺頻豎塵光臨殿角疊浮杯
登堂言句分明舉入室機緣勿用猜四海英靈憑去住龍池獨步任從來

和錢維宇居士

凡聖都來掌上揮星移斗轉看流輝枯藤作杖青龍活爛草成鞋白象威
正打令行誰肯覺旁敲驀地孰知非如君不媿參禪客九上天童喚不歸

和瑞光笠雲禪師扇頭韻

大唐闊步絕無儔踏倒須彌百億州迴脫無依開正眼清風明月兩相酬

贈張敬泉居士

諸天三寶常恭敬福海長流無盡泉順逆滔滔曾不間縱橫活潑任方圓

贈陳君偉居士

君偉大事信多年忙裏抽身不著邊獨顯赤心常片片看來真種火中蓮

贈張瑞甫居士

唯我知君不外求聽天株守是根由光陰不換寸金去有好兒孫何用謀

贈張吉甫居士

寬然厚道與人周性海無風舟自流渡盡我人登彼岸一輪明月碧波浮

示明法

明法因由為汝宣迴光自覺速須研唯心三界憑君往作佛當前總寂然

贈項秀南居士

法門梁棟顯奇功拄地掌天振八風這裏若還搖不動當來般若智無窮

贈慧生耆宿

慧日高懸耀我晴普天匝地悟無生玄通法法隨心印無礙頭頭似掌平
能破千軍諸室暗普同萬載犬光明遍周沙界全身露百億須彌觀面呈

送蒼霞法兄住牛頭塢

孤峰頂上獨為尊榔栗橫擔不顧人雙徑難藏千古月一輪易覆萬山春
牛頭祖父從來舊馬足兒孫又復新共氣連枝呈好手三玄三要本同真

和青龍和尚扇頭韻

溪山各異錦重重雲月雖同映梵宮合飲建平甘露水同彰廣德播宗風
曇華彌滿龍山座優鉢江陵豁達通共氣報恩為晚渡連枝祖道日東紅

贈錢佩玉居士

千華臺上光明藏現卻靈山那一尊去歲殷勤今又猛始知辦道久長心

贈超出

踏著方知得自由無憂無慮度春秋雖然舊閣閑田地幾個親曾到地頭

李欽安居士

當體全空不假名色空明暗掌中擎乾坤日月憑收放活脫縱橫自在行

朱君昭居士

毫端點出迴丹青手手玲瓏日月明法盡融通能普利和光無處不縱橫

贈公安張居士

行無住坐無止行住坐臥忘彼此彼此不分絕去來孤明歷歷廓終始始終不二自閒閒獨坐當陽無個事見也麼咄覲面全提惟直指

示姚敬泉居士

普應高低種福田善栽一切眾龍天四聖六凡波羅蜜兩足齊尊一並肩

朱伯卿居士

密行潛修世莫知檀波功德起人思知因識果龍天祐兩足齊登達正基

羅奉泉居士

為人朴實是修行夢幻空花須自評聖號賢名權借用南山紫氣慶長生

龔蔚彝居士

妙湛圓明在未生未生面目廓然明只消彈指功夫到突出摩醯正眼睛

李瑞雲居士

學道由來澹利名直教心死道方明室中有伴常精進得本還源顯大英

聞孟卿居士

不二堂前萬古同普天匝地扇仁風靈山一會依然在迴出扶桑日正紅

贈濟宇陳居士

道本恒常貴在仁菩提一會道方親依然殊勝觀音力微妙莊嚴遍剎塵

贈曹奕芳同俊明喬梓

維摩室裏欣今日格外知音空合空三萬二千同一榻恒河沙數共禪宮

朱君令居士

蜜雲堆裏駕孤舟水底青天翠欲流月載滿船光皎潔風恬浪靜碧潭秋

贈見月禪德

一輪皎潔普天輝體露金風匝地歸萬里碧波含有象千江翠色洞無依
澄澄湛湛超三際歷歷明明越四維一目了然收攝盡殊塗合轍迴全威

示信甫郃居士

明珠一道耀滄州懷抱高超越格流世世永離三界苦生生常住一輪秋
未登寶所休停腳直造毘盧頂上頭一念萬年恒自在西來直指別無儔

贈南山李茂初居士

福海滔滔唯茂初生來性稟智無更魏魏氣宇齊瞻仰卓卓端方貴在行
出入融通真道德縱橫無礙顯斯人夙承道愛殷勤甚千里同風效我誠

陳敬元居士

齋僧塑佛龍天喜造殿修橋神鬼歡念念迴光開信地如君不肯自心謾

汪侍蘭居士

西來的意自評評直指無言當下明列祖相傳無實法覓心不得即無生

張尚公居士

本來無佛無眾生取捨之心正眼睛眼裏蓬塵著不得不消一句了然明

徐胤蕃居士

學道無難貴老成萬年一念再無更靈靈不昧常安樂了了恒知證不生

示王明伯居士

古聖從來不自求先賢克己伏人愁自他俱利稱豪傑越古超今出眾流

示聞悟

若能轉物即如來一念回頭信地開聞悟了然恒湛湛寶華王座妙蓮臺

示超功

安居無事好修行勿負前因昧此生順逆風來吹不動菩提顯現自然成

示大坤

道在身邊不用尋舉止動念與拈鉞卒然刺著娘生面始信從前錯用心

示超佑

參禪學道要堅心莫昧靈感觀世音歲歲殷勤今又猛始知大地是黃金

示永覺

請君學道早修行返照迴光須自評父母未生何面目頓然獨脫了無生

示汪應鳳居士

及時耕種及時收急裏抽身急裏修果滿功圓時節至融通二諦逞風流

嘆世

茫無本據使神通晝夜奔求錯用功名利鬧場休久戀請君莫昧主人公

謝眾檀信

一喝當陽應萬機諸檀福慧等天齊聲聲哮吼超三界覲面全提迴悟迷

詣南和尚辭院

濟北寥寥意在秋嶺南列派更綢繆弘宗得髓人天慶宴坐調心大地酬
雲散日輪真體露水含明月不同流光揚祖道斯為首說法婁東第一儔

贈齊葵林居士

無邊真照迴葵林撥轉靈機耀古今貧道自慚無可贈聊拈短句謝知音

和管有葵居士韻

愛河竭盡不須舟苦海掀翻絕點流任性逍遙忘歲月隨緣放曠度春秋
玄通殿上初行腳無礙堂前正起頭諸佛三千齊合掌即今諸佛共同酬

悼香林佛古和尚

道化婁東志未休法幢高豎播神洲宗風大闡長安地貌古曾承天子眸
跨步蹋翻波底月舌端吐露海中漚綸竿罷釣英賢已賴有兒孫普應酬

初夏偶成

綠樹蔭濃覆夕陽小菴倒卓影池塘南來荷葉微風動當體清涼一段香

秋思二首

心同孤月普天秋曠野遙觀大地愁盡說死生皆有分看來那個肯回頭
幽鳥棲林不記秋井梧葉落始知愁潑天潑地騰空去何故諸人不轉頭

除夕

鑼鼓喧闐送臘神不知此夜孰為真圍爐共說無生話擊竹惟憑有主人
一體同觀三昧火無心不落萬般塵瓶梅未藉東風力預掇枝頭幾點春

元旦

妙手全彰臂未伸展開大地古今春老梅遇雪誰賓主嫩蕊逢霜孰主賓
百寶光中顏不改千華臺上色更新掀翻宇宙須知已笑傲閭浮過量人

付監院朗真徒

一條拄杖撥微塵撥盡微塵獨朗真耀古輝今恒不絕喧天震地播家珍
咄全機大用提新令濟北宗風賴子振

付盛夫人(法名超祖)

祖道當興一輩雄女中豪傑顯威風圓通寶殿千年盛無礙堂前萬載隆

贈超凡優婆夷

山僧最怕嘴盧都兄弟聯芳意不殊共氣連枝咸個體一條拄杖兩人扶

精進堂滿七

一二三四五六七羅紋結角在今日箇中切莫自瞞肝那事如何得的實

示朗月

朗月孤圓不住工光明燦破太虛空普天匝地超凡聖耀古騰今越始終
豁達威音個面目融通那畔主人公大千沙界毫端現百億須彌掌握中

示普蓋沙彌

一點無明俱普蓋慈雲彌布不通風豁然覲體薰風至殿角微涼徹已躬

贈張仁甫居士

超宗越格不他同從此歸心善始終一切周全常道愛法中弘護賴吾翁

與普擎禪德

一切多來是普擎云何覲面不舒呈頭頭物物澄澄露剎剎塵塵湛湛明
句裏超宗弘祖道言前達本顯無生縱橫順逆皆方便手眼通身絕愛憎

卓菴禪德呈偈荅之

攔腮一擲迴千秋直下能消萬劫愁這裏若然親薦得波翻浪湧出人頭

示恒一師

牢關把住不通風內外中間絕始終信腳踏翻關捩子古今恒一老禪宗

示融和

如來妙道本融和堪笑時人錯過多兩眼分明無別物請君薦取莫懨懨

徐君選居士

知君不被愛情纏寶劍橫拈直向前揮盡塵緣須自肯是名精進佛齊肩

示洞然

學道先知忘我人我人不立道方親洞然突出娘生面物物頭頭是本真

示普明

浩然不動契無生若入無生無不生蕩得胸中憎愛盡普明即是月孤明

贈超覺

父母非親那個親半生為道究前因當陽點出其中意直下知歸脫體人

示普信

一切同天俱普信十方共日要知因長年努力時時究每月精勤日日新
禮拜殷勤求出世汗勞忍苦顯斯人功圓行滿離三界果熟香飄脫六塵
佛界魔宮憑汝意人間天上自為珍

為菴主出關語

渠年三十一回頭六六為僧作比丘懺法三時勤發露華嚴八部誦無休
經書舒寫真圓妙秘密全彰輟芥投把住玄關忘去住放行鳥道沒蹤繇
宗親一一俱超往伴侶雙雙樂自由地軸掀翻無上士天關撥轉顯高流
三年行滿功無關千日重輝無不周一切諸檀通報荅十方信施悉皆酬
人天入室開雙眼佛祖臨門展兩眸全始全終全意氣虎頭虎尾一齊收
且道收放縱橫一句作麼生道響問取關中主
大方禪師禪燈語錄卷五終

佛事

送諸檀神位入不二堂示語師云勅立禪燈振祖風騰今耀古不殊同生擒戴角三山虎活捉驪珠四海龍一二承萱張吉甫四三敬老秀南翁諸檀竭力人天祐眾善齊歸法道隆如是因緣如是果無邊勝福享無窮千年常住無生滅萬載留名表始終世世知因居佛地生生不昧主人公遂托神位云過去未來現在各各還知自己安身立命處麼山僧今日和盤托出更有一問大眾且道如何是吉甫承萱敬泉秀南諸公的面目汝若識得他的面目便識得自己的面目識得自己的面目更識得三世諸佛歷代祖師的面目總未識得山僧不免重下註腳乃安神位云金剛不壞金剛德無漏堂中無漏功。

為項秀南居士封棺師云秀南翁秀南翁撒手懸崖末後雄觀體不違諸佛道轉身抹過太虛空庭前親友談如昨堂上兒孫淚血紅惟孝惟仁無盡意思恩思德不雷同孝揚冉子稱千古名與張公萬世隆驀豎拄杖云秀南居士到這裏還有羅籠不肯住呼喚不回頭者麼咦勿用山僧重註腳相逢盡在不言中以拄杖打圓相云封。

盡七請對靈垂示師云及第心空孝善前心空及第為君宣全消億劫情緣盡掃蕩多生溺愛纏表正行端登兩足行端表正佛齊肩上和上睦陰陽順令子賢孫世代綿靜坐影堂恒自在看來真是火中蓮金蓮一朵根深秀玉蕊枝頭五葉鮮七寶池中紅燦燦八功德水碧漣漣波光淡蕩涵秋月花雨繽紛散滿天踏著上頭關捩子率陀宮裏伴金仙有人未識君前事今日山僧再舉圓復云昔日古唐頻布施當年繡雪化慳貪披霜帶露勤精進冒雨衝風自肯甘密密禪燈大護法綿綿大覺小伽藍時時極樂無生話刻刻蓮邦國裏談勝境明師曾頂禮名山知識應時參汗勞能忍曾無怠不惜危亡力荷擔大眾正恁麼時且道秀南居士真機獨露迴脫塵緣又如何委悉豎起拂子云一道靈光常不昧堂堂在處現瞿曇。

為瞿氏老安人臨終垂示師云智種靈苗同希增秀果熟香飄我今受授阿耨菩提達無前後生死關頭急須通透祇如獨脫一句作麼生道阿呵呵無男女相箇中賢本地風光名不朽。

請對靈垂示師云惟君道念如天遠汝又誠心地久長列聖若知冰雪冷諸賢聞聽攪枯腸以如意擊香几一下云寂蓮寂蓮可聞麼又擊一下云還會麼攜身換步出蘭房端坐無為在影堂彈指直超安樂國剎那迴脫即西方咄山僧今日毫無贈般若聊將為舉揚。

為繡雪堂頤陳大師燒香師云霜鋒雪刃氣磨礪兩處開堂演濟宗繡雪堂前弘大教祇園會上播家風金明列派分南北興善抽枝迴別同法至婁東經暑夏道行吳地幾寒冬婆心特煞為人切願力弘深志未窮報化佛頭談實相豈期縮手告緣終遂擊香几一下云現前大眾還知我繡雪堂上法兄和尚絕後光前波翻浪湧底樂處麼若有知得不妨師師授受祖祖相傳作他兒孫源遠流長去也喝一喝云拈起一枝無孔笛好風吹入九霄宮。

為繆仕賢居士臨終垂示師云八十年來一老叟真誠朴實出人頭未生面目君須薦脫體風流得自由遍界縱橫憑去住隨方瀟灑任優游塵塵入毘盧性剎剎圓融最勝幽一切聖賢如電拂大千沙界海中漚。

為齊葵林居士臨終垂示師云恕名齊姓別號葵林透海穿山努力追尋撒手他方高著眼看來誰合我胸襟老居士當著猛省更莫沉吟然雖如是且道末後一句又作麼生咦一覺黃^梁歸故里光前裕後孰知心。

請對靈垂示師云堂中宴坐誰為主室內橫眠孰作賓坐臥主賓原不二同觀一體現三身法身無相君須薦法眼無瑕汝自琅肉身是假終歸假色相非真卻像真真假齊齊齊不立堂堂獨露本來人齊老居士識得本來面目成佛已竟良久震威喝一喝云當陽一喝三身具覲面全提兩足尊。

為張桂亭居士對靈垂示師云桂亭桂亭昭昭靈靈師長不問撩起便行撒手懸崖與麼去千華臺上證無生。

為顧爾招居士對靈垂示師云昔日深思顧爾招先年一帶至瓶窯途中底事叨君力柳燭枝香特為燒半偈頓超離五慾電光影裏八風飄。

請為嚴雲山居士對靈垂示師云老僧舉目視雲山靜坐虛堂體自閒昔日曾為門弟子今朝信步一回還故我雲山居士法名即是寂光就向於法名上指引他一條直徑令他隨方自在到處逍遙寂光三昧遍河沙凡聖含靈共我家一念不生全體現六根纔動被雲遮驀豎拳云處士嚴公還見寂光麼復展手云若向這裏承當得去名為頭頭上明物物上了山僧恁麼告報汝等還識得雲山居士也無良久乃拍香几云一擊忘所知更不假修持動容揚古路不墮悄然機。

為寂中上座舉火師云婁江生兮婁東死死後生前在已躬立志出家明大事堯峰薙髮上天童清關橋畔非遊戲太白峰頭問密翁十載殷勤山不出多年共住眾禪宮子身仍舊歸鄉隱脫體重新越始終六十九年心未歇未生面目與君通攬火把云看取爐頭真火色方知腳下綻芙蓉。

為悅修禪人舉火師云為法忘軀這比丘尋師訪友不停留悄然一念迴光去脫體風流得自由正與麼時還信得及麼若信得及四恩三有一齊酬祇如酬恩一句又作麼生道擲火炬云觸體乾盡娘生眼萬頃滄波觸處周。

為張氏安人對靈垂示師云瑞雪飄空雲鶴聚繞玉樹銀山洞明分曉看來湛爾常存正體真如特標即此放曠隨緣現前受用不了當與麼時張老安人還識本命元辰落處麼儻或未然山僧為汝覲面去也遂舉手畫此◎相云匝地普天如幻覺白蓮華上任逍遙(是日值大雪)。

行實

予生緣嘉興府桐鄉縣人父錢姓母沈氏一夕夢紅日而誕於甲辰六月初七日巳時幼性頑魯不肯句讀至十四歲好習武業年十九每見殺傷之感遂有出塵之志二十歲父母強配婚是年茹素往雲棲修淨土長嘆六親拘牽不能如願二十九歲因閱壇經纔得棄室投徑山明珠堂禮無異師披剃年三十閱禪關策進疑情頓發但看轉動施為是個甚麼無有入處遂往參天童密老和尚次日問云弟子不會修行求和尚開示童云我也不會修行予便禮拜童驚頭一踏當下便知落處只是滿口道不出朝夕請問只是痛棒打出三十一歲得戒於老和尚作務三載日增微疾告假出山是時萬如和尚為侍者命送關妄七書并崆峒判語乃接回徑山同羯磨師住靜將有二期觀音殿請萬和尚為板首予隨進堂因病中自嘆云人命無常在此呼吸之間就要討個分曉即將一口氣不來向甚麼處去如是參究昏沉竟如山堆一般總無入手處至第七日昏沉稍退第八日喫早粥上單坐到晚間放又放不下提又提不起身心如木石相似挨到第十三日經行次撞著露柱不覺通身慶快正所謂虛空粉碎大地平沉境界那時便會文殊菩薩偈云一念普觀無量劫無去無來亦無住可惜不遇作家翁卻似死了不得活時內外奮發盡道這個長老著魔了一日詣普賢庵見妙宗師宗問人人說你著魔果有這等事麼予便掌云不可貴耳賤目宗當時面赤予云老師還知麼宗便口裏亂罵予云你著魔了一日到東坡池見雪嶠大師師便起身予問云畢竟一歸何處大師舉箸云請餛飩予云一飽忘百饑大師休去一日至真寂禪院因永覺和尚設有三問一問威音王以前是何人受戒予云胡張三黑李四二問戒光從口出非青黃赤白黑且道果是何色予喝一喝云且道是何色三問破戒比丘因甚不落地獄予云天不能蓋地不能載年三十五到顯聖參爾密和尚禮拜起爾便問云那裏來予云徑山來爾云老人在甚麼處予云適纔與和尚相見了也爾云即今響予云又要重說偈言爾云增錢不如再看予一喝便出一日到雲門結制六如師落堂問眾云萬法歸一一歸何處予便一喝六云好一喝予云好在甚麼處六亦喝予云不是你家茶飯六云是那家底響予又一喝云高著眼六云莫不是天童來底響予云作賊人心虛六休去遂有結茅之意因到太倉三載募緣並無塵境之礙至三十九歲仍回明珠堂掩關作一偈云凌霄峰下明珠現腦後神光常覲面耀古騰今遍界施巍巍獨坐金剛殿年四十二出關到天目山禮高峰中峰二祖塔兼訪古淵兄古云何不往金粟親近老人去年四十四欲到天童掃塔適費和尚應請天童承古兄有書相招予往武林遇和尚于艮山門外殊勝院相見次和尚便問我手何似佛手予云那個男兒沒有尚云我腳何似驢腳予云不妨步步踏著尚云上座生緣在甚麼處予為手舞足蹈尚云且坐喫茶予遂到天童掃塔畢過雪竇見石奇和尚留住客寮屢將頌古相呈亦蒙珍賞再三委住大梅堅意不允復回太倉住靜年四十七聞費

和尚離超果至太倉經過予往接多蒙慈誨隨到福嚴知客寮一日尚問梧桐葉落傳秋信一語投機事若何予云金風體露尚云再下一語看予便禮拜尚云墮也予便一咄尚云墮也墮也予連咄兩咄便行次日尚復問大方再下一語看予云昨日與和尚道過了尚云阿誰證明予云賴有和尚在拂袖便出遂呈一偈金風體露正堂堂禮拜分明絕覆藏昨日與師道過了今朝何必更商量尚閱畢問云如何是你的全體予云無毛鷄子貼天飛次日尚又如前問予云象王行處絕狐蹤尚云這個是古人的予云即今請和尚道尚云待案山點頭即向汝道予云案山點頭了尚云向汝道甚麼予云瞞別人即得尚便起身將予推出門外予時不覺通身汗流大得箇安樂處一日尚垂語云天上星皆拱北人間無水不朝東意旨如何予云到頭霜夜月任運落前溪尚云未在更道予云何處不稱尊尚云少賣弄予云要和尚曉得是年和尚有應徑山之請命予典知藏越六年職後堂一日尚問予云乾峰道舉一不得舉二放過一著落在第二意旨如何予云學人落二了也尚云只道得一半予云這一半留與和尚道尚云我替你不得予便喝次日侍和尚至御碑亭偶有一僧提菌子過尚云喫了要喪身失命予云好個消息尚云端的在甚麼處予一喝便行尚云死活也不知一晚尚問獅子為甚麼被文殊騎予云顯大機明大用尚云還在獅子分上文殊分上予震威一喝一日進方丈值尚睡次因單前有一盆火尚便問做甚麼予云來呈拈頌尚云火裏拈得一根毛出麼予便喝尚云拈不出予云要識真金火裏看一日尚又垂問云柏樹子幾時成佛待虛空落地虛空幾時落地待柏樹子成佛意旨如何予云任從滄海變終不為師通尚云又恁麼瞞預去予連喝兩喝而出尚又問眉毛額下生道一句看予撒手便行尚又以拄杖橫按几上問大眾道一句看予作掀翻禪床勢即呈頌云掀倒禪床大顯機翻身獅子露全威當陽一句超三際萬仞峰頭撒手歸後和尚住維摩予因事繁告假出山復至婁東掩關前後十年蒙老人屢次著人探望更承大慈白嶠二兄相邀往福嚴予矢志甘繼龍山亮座主之高流至辛未春承石丰兄過婁東訪予時予往徑山完大士像不值到臨安橫板溪石丰兄一見便云庵村老人特差小弟上徑山建壽塔欲兄共董其事復同至吳江祖師殿石丰兄要予登舟予不允石兄先往次日予始至石兄云老人要兄承當大事予云自忖薄福石兄云不必太謙予勉強進見老人遂掛入室牌大眾齊至老人便問馬祖一喝百丈直得三日耳聾意旨如何予便喝老人云要道一句聲未絕予云雷音動地乾坤震霹靂驚天宇宙轟老人又問世尊拈花迦葉微笑意旨如何予云誰不丈夫老人云未在更道予比時不假思索隨口頌二首老人頷之復云你平日間可有拈頌麼予云昔在徑山後堂寮曾有拈頌幾則老人云可呈我看予便將舊稿送呈方丈老人看畢顧予云儘有過人處老人即當眾付囑予時不敢受飄然竟上徑山至七月終往建平因望石丰兄予至廣德八月中老人遣石兄送源流拂子到雙徑西慶庵其晚予亦不允本山諸尊宿輩諄諄相勸予始遙禮九拜復還婁江住靜時因眾護法懇

予開堂堅意懶出人前終日土面灰頭不是匾擔便是鋤頭無喜無憂生平醜拙今日無端特地剖露取笑諸方忘世行道汝等諸人切莫依樣葫蘆伏惟珍重。

塔銘

清傳臨濟正宗三十二世禪燈菴大方海和尚塔銘。

前奉 敕整飭關南兵巡道陝西按察司副使

婁江錢廣居撰

師諱行海號大方古樵李桐鄉人錢氏子母沈氏始有瑞徵夢紅日而娠生於萬曆甲辰六月初七日巳時幼性倔彊不喜章句年十四學騎射壯欲請纓閭里皆憚之時當弱冠從父母命擇婚落落自處澹然也比見鋒鏑殺傷之慘遂萌離塵之念非師乘顧而來曷能發此見地是歲茹素入雲棲修淨土忽忽二十九歲閱壇經憤激棄室決意出家禮徑山無異師披剃參動轉施為是箇甚麼疑情隱躍無有人處往參天童密老和尚見云弟子不會修行求慈悲開示和尚云我也不會修行師禮拜和尚驚頭一踏當下知歸只是道不出此是觸著師之鼻孔好一消息也甲戌得戒於老和尚作務三載乃回徑山同羯磨師住靜將有二期觀音殿請羯磨師為序首遂進堂師因微痾自嘆云人命無常爭於呼吸就參一口氣不來討箇分曉至第十三日經行磕著露柱不覺通身慶快如琉璃瓦子脫落萬丈深岩之下恰是虛空粉碎境界次詣顯聖寺叩爾密和尚問云那裏來師荅徑山來徑山老人在甚麼處某甲適纔與和尚相見了即今響某又要重說偈言和尚云增錢不如再勘師一喝便出時行腳到婁東便想結茅雖出入市廛而道友皈心並無塵緣之礙聞費老和尚杖履經過州中師見輒契隨到福嚴寺結冬休夏親近甚久揚眉吐氣前後十年常如一日志尤超卓不肯遽受付囑辛未春石丰禪侶來訪師云浮石老人約兄往承當大事師云付已薄福尤恐負恩迨後同見老人懸入室牌大眾雲集老人問馬祖一喝百丈三日耳聾意旨如何師便喝老人云上座要道一句聲未絕師云雷音動地乾坤震霹靂驚天宇宙轟又將平日拈頌若干首呈送方丈老人印可意即付囑師知之飄然它往暫憩廣德老人遣石丰禪師齎源流拂子於雙徑西慶菴本山尊宿證明囑云付汝一柄拂了汝參學心當效脅尊者利益無量人師隨望空作拜師兩次掩關閱三年寒暑勿間而經論博洽智光迴露洵謂時至理彰不假思索已西佛誕日本州護法吳觀察魯岡錢憲副大可及四眾人等啟請師上堂說法開豁人天眼目其為全提大用不異香象渡河截斷眾流人人聽之咋舌自師積半生心力募造千手眼菩薩檀像成就亟於庀材鳩工卜

吉豎梁柱高插碧漢不避風雪勞而稍恙庚戌二月初五日子時沐浴更衣吉祥而逝夫師世壽六十有七臘三十有六行化三十餘載所著拈頌法語偷次六卷吳太史梅村製序尚待剞劂付授弟子有人其嗣法稱伶俐衲唯超鳴而已又優婆夷超祖超凡得師根本戒參萬法歸一有省惜祖謝世余與師結方外交謬蒙獎藉今超鳴超空二師紹和尚之志借檀波之施新殿巋然豎起剎竿可垂不朽復謀建塔瘞師靈龕于禪燈菴之西阡而請余銘之銘曰。

師乘來顧接臨濟宗驀然一踏三頓同功世出世法拄杖如龍方其有契密不通風掩關操履脫體玲瓏詞忽倒峽思若迴颿西來的旨提唱婁東當陽法戰頭尾雙融蓋天匝地具眼稱雄近昭師德遠播祖功真常迴露以空合空觸手不犯弄棘栗蓬任運自在躡妙高峰四生普利權實我攻全賓全主無異無同英靈好手機緣恰逢建立法幢今古尊崇紅輪西墜痛師在哀一燈長燄振瞋撕聾語勒玟石光徹穹窿
大方禪師禪燈語錄卷六終

CBETA 贊助資訊

[. \(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。（銀聯卡不支援定期定額）

[前往捐款](#)

劃撥捐款

郵政劃撥帳號: 5 0 4 6 8 2 8 5

戶名: 財團法人佛教電子佛典基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
